

馬象知之率伴人奴僕執順象月下逢皆斷其髮命凶義禁府鞠之○
兵曹據慶尚右道處置使牒呈啓倭船一隻來泊巨濟之南周原島追
擒六人囚之沒入船隻及所載之物請將賊倭分置各官更推所賣物
色從之○乙未御經筵輪對○上曰御膳至重承文院提調以爲今進
獻可無奏本此何謂也小邦進享上之物可無書乎予以爲甚不可也
此無乃卞季良之說歟右代言許誠對曰諸大臣皆云宜載奏本唯李
良曰今此進獻非事之正者可除奏本○丙申輪對御經筵○左司諫
金孝貞上疏曰補充軍之法永樂五年領議政成石璘陳言前朝之時
各領隊副外有補充軍乞量宜舉行此法誠有補於國家而其授職之
法曾未有聞也至永樂十二年議政府受教二品以上婢妾之子永許
爲良限五品授職雖有大功賞以錢帛田民毋過其品永樂十三年議
政府六曹同議受教三品所生限六品四品所生限七品五六品所生
限八品七八品所生限九品九品權務所生限學生庶人所生限白丁
太宗殿下深仁厚澤至矣而限之之法嚴且詳矣又於永樂十三年議
政府六曹同議受教一品以下賤妾所生限品授職者毋得結婚於兩
班之家其辨貴賤嚴嫡庶之分可謂至矣臣等今見兵曹移文二道其

一二品以上賤妾所生受隊長隊副者並許甲士取才其一三品以下賤妾所生及雜色補充軍出身隊副隊長者取才限品叙用臣等以爲此等人並試於兩班子弟以充禁衛之職其不可者非一二也若不計仕之久近而取才驟授甲士之職則補充軍之法因此而毀其不可者一也向也爲僕今也或與其主同升官職是加冠於屨其不可者二也始雖限品授職終必混淆無別限品之法亦隨以改其不可者三也嫡庶之分猶天建地設不可紊也今皆顯授則尊卑失序名分以紊其不可者四也受此職而得是名則不數年間必結婚於兩班之家雖欲正之嗟臍何及其不可者五也小人道長君子道消勢之必至彼盛則此微灼然無疑其不可者六也此輩並列於子弟則其爲子孫者亦以其職爲卑而舉皆失望其不可者七也至若雜色補充軍限品授職之法曾未有定而並試叙用其不可者八也况我東方禮義廉恥亘古不泯者專以上下尊卑之分有定也且今人才輩出子弟之能射御有家產者不可勝數雖不用此輩亦足充額也養嘉穀者必鋤其稂莠稂莠茂則嘉穀必傷理之自然也在 太宗朝如此之輩獲蒙特旨受西班牙五六品之職者蓋亦有之然其數不多可屈指而計不爲混也如有不得

已而用之則臨時特旨除授亦無害矣伏望 殿下亟收是命以副輿
望○賜祭于卒摠制李蘭教曰竭誠效勞臣之所以委質推恩加恤君
之所以念功禮緣于情宜示息數惟卿夙姿雄偉志行純勤既爲同姓
之親而有折衝之略初陪 太祖原從著名繼事 太宗宿衛踰紀寡
人以禁庭久侍顧眷良深爰陞摠制之班仍授處置之柄尚賴干城之
固庶弛宵旰之憂夫何中年天奪其遽計音忽至予甚悼焉茲命有司
俾陳薄奠靈其不味庶悉至懷於戲休戚與同心永看於終始幽明無
間禮當盡於哀榮○賜賻敦寧府判官李厚米豆并十五石紙八十卷
○丁酉輪對御經筵○以晉平大君瑒妻尹氏爲三韓國大夫人李明
德刑曹參判金孝孫禮曹參判韓惠趙慕左軍同知摠制邊孝順嘉善
柔川君李師純司憲持平羅得康司諫院左正言李伯黔右正言○左
司諫金孝貞等上疏曰右正字任孝仁當進講書筵告病不仕乃請左
司經曹尚治尚治托以告課公事且非番次遂致遲緩書筵重事也雖
非當次如知講官不足則固當進詣不暇乃托不緊之故安然在家三
請然後乃來未及進講殊無敬勤奉職之意伏望下攸司科罪不允○
戊戌視事 上謂贊成權軫曰黃象之事畢鞫乎軫對曰拷訊象二十

象云母未葬招月下逢宿殯所者五次也各人供招亦然○輪對御經筵○義禁府啓黃象律該杖一百李順蒙八十月下逢九十命杖象二百收職牒順蒙外方付處杖月下逢還定洪州官婢人以爲順蒙既奪交友之妾又當其妾受杖之時使伴人及奴婢區區救護恬不爲恠其心行狂妄不肖甚矣○大司憲趙啓生等上疏曰黃象爰自小時巧言令色服美于人恣驕淫之行得遊狹之名昔與金宇爭妾相鬪污穢之名彰聞中外識者恥之濫承眷顧超遷政曹駭於衆論固當改悟自新洗心滌慮砥礪名節今遭母喪方在衰經忘哀溺色密招娼妓潛奸殯側塚土未乾再往妓家縱淫無忌行同禽獸已非人類又發妬情夜到妓家斷髮脫衣親自打傷其汨沒大倫敗毀綱常未有若此之甚者也傳曰忠臣出於孝子之門以今日所爲觀之則象平昔向上之心從可知矣李順象性本狂惑又無才行但以功臣之胄位至二品曾不謹慎貪冒女色監巡之日擅離直所微服徒行偷奸象妾遂被斷髮脫衣以辱其身論其心行則有甚於市井之類况象忠義同盟親猶兄弟敢懷獸心尚忍爲之孰不可忍爲也且事覺之後略無慚色覲面于朝又奪其妓置諸私第其無恥之心亦未有甚於此者也今只命杖象黜順蒙

于外殊非聖朝懲惡礪俗之義伏望命黜象于外收順蒙曆牒以戒荒
淫之輩以正綱常 上以疏語涉不敬命囚啓生及執義安崇善掌令
宋褒趙瑞康持平金僇于義禁府疏中所言金守所爭之妾乃倡妓加
伊也其後 太宗以善歌納之宮中有寵遂封翁主其曰污穢之名彰
聞中外識者恥之之語有違臣子諱避之義故有是命○戶曹據江原
道量田敬差官呈啓雖付籍已墾之田年久還陳雜木茂盛山谷之田
請勿并量從之○咸吉道城基巡審使工曹叅判李蕙啓上護軍崔澄
言若移排慶源府于甫理院龍城于石幕豐丘站兩平中使專防禦則
但用北青以北軍馬可能防禦臣與監司都節制使同審慶源府時排
之所則高郎歧阿山釜回還等三處乃野人出來要路故防禦便易若
甫理院則野人出來綠楊院至釜回還及高郎歧道路相隔賊若出其
不意突入虜掠必不及追捕矣况於甫里院綠楊院高郎歧等處分兵
防禦其勢最難且甫里院四面山高地勢狹隘不宜置邑土地亦未寬
廣慶源府仍舊爲便若乃石幕豐丘站兩平中設置城子則自龍城至
石幕相距五十餘里賊若入侵多渴洞龍城兩處必由石幕實爲要路
然其間屢涉大川濱崖險阻赴急之兵往來甚難不宜置城自龍城趨

石幕二十餘里有嶺曰獐項兩山相距二百餘步古設口子關防遺址尚存請於此設木柵除龍城赴防軍百餘名防戍又以其間可耕之地三百餘結分給高郎歧以南疊入五十二戶田地不足者使之耕稼則防禦便易民生富庶守約利博誠爲長策矣且本道兵船中大船之制遲鈍不快如遇倭賊必不及追請送京畿船匠一人教其體制并改造中猛船以實防禦命兵曹與政府諸曹及曾經其道之任二品以上同議叅判鄭招崔士康判書金自知李孟昉安純崔閏德申商吳陞判漢城李種善叅贊盧閑贊成權軫右議政孟思誠左議政黃喜等以爲慶源府仍舊爲可獐項設柵亦可但其防戍之兵若取龍城赴防軍百餘名則恐龍城反爲單弱宜於獐項只置數十人爲斥候使民春夏逐田耕作有變輒報使其散避招自知孟昉純閏德商閑軫思誠等以爲宜送京畿船匠改造中猛船士康陞種善喜等以爲送京畿船匠但改修舊兵船從喜等議薦又啓臣與監司都節制使同審吉州龍城城子移排之所吉州時排處西有大川東有小川兩水交流之地今年雨水西川衝擊崖岸崩頽幾浸邑居自岸距城基僅七十餘尺自城基東距小川一百九十餘尺誠宜速遷且邑城未築移徙尤便自時排處北去五

里許有平原廣闊處東西川相距阻隔固無水患本州四境及慶源鏡城往來道里適均於此移排爲可龍城時排處則本是沮洳之地今年大水汎溢浸城內者深二尺許將必爲水道自時排東北五里許狄洞前平地勢廣闊阿木河及慶源狄人出來要害之地於此移排防禦亦可命兵曹與政府諸曹及曾經其道之任二品以上同議僉曰可從之○已亥雷○視事輪對御經筵○義禁府請加黃象李順蒙之罪命安道象于高城郡付處順蒙于忠州○削趙秩黃象等忠義衛籍○庚子輪對御經筵○義禁府具趙啓生安崇善宋褒趙瑞康金徑之罪以聞命召左議政黃喜右議政孟思誠禮曹判書申商曰今憲府請治黃象李順蒙之罪則然矣然其疏內有及赦前之事且敢舉太宗時事洪氏入侍先王封爲翁主若先王在世則豈敢并發於口乎予不敢忍聞矣憲府之言爲黃象而發也安崇善初發黃象會犯之事既而言曰黃象金字爭妾之事乃干於上何以處之趙啓生以爲雖干於上不斥言洪氏何傷之有於是舉府合辭請罪憲府之罪何以處之喜思誠等對曰因黃象之事發此言是失覺察也輕則罷職重則付處何如商曰若憲府初不知而發言則已矣有曰干上之事何以處之答

云不斥洪氏何傷乎是既知干上而敢言之不敬孰大焉 上曰卿等
之議不一予將折衷命左代言金赭曰此事語涉 先王非予所可獨
斷而赦之也大抵一官之事必行首及掌務知之況此書掌務趨瑞康
操筆大司憲諾而成之罪在行首掌務并付處于外可也遂付處啓生
于稷山瑞康于江陰罷崇善褒徑職○辛丑三韓國大夫人尹氏來見
上與中宮御恩政殿設宴徽嬪及宗親內外命婦入侍○咸吉道鏡
城郡捕進海青一連○兵曹啓三軍鎮撫初設三十人今增爲四十人
請減十人從之○壬寅輪對御經筵○遣左議政黃喜禮曹判書申商
于平安道巡審城堡○以辛引孫爲司憲執義尹炯趙克寬掌令李重持
平李伯黔左正言盧尚志右正言○平安道德川郡捕進海青一連賜
監司都節制使各一表裏德川郡官衣一襲○吏曹啓謹按周官小宗伯
掌三族之別以辨其親疎漢因秦制稱宗正後改名宗伯後漢宗正掌
序錄王國嫡庶之次郡國歲因計上皇族名籍若有犯法當髡以上先
上諸宗正宗正以聞乃報決兩漢皆以皇族爲之宋宗正寺判寺事二
人以宗姓兩制以上充闕則以宗姓朝官以上知承事掌司皇族之籍元
豐後不專國姓修玉牒官掌修皇帝玉牒序宗祧紀族屬其後以玉牒

與國史相通以史官兼

皇帝玉璽十年一進宗親

錄每歲寫送龍圖天章寶文閣

源積慶圖宗

嘉寧

九年以宗學隸宗正寺大宗正司知及同知官各一人丞二人以宗室

團鍊以上位高屬尊有德望者為判大宗正事丞一員以文人充掌糾

合族屬而訓之以德行道藝受其詞訟而糾正其愆違有罪則先劾以

罰法例不能決者同上殿取裁其不率教者以法拘之歲久知悔則除

其過名本朝宗簿寺即古宗正之官也合宋宗正寺及修玉牒官與夫

大宗正司而為一者也其職未盡合古乞以宗親位高屬尊有德望二

人為提調判事以下以宗姓朝官及庶姓交差無宗姓朝官則專用庶

姓職掌敦睦宗族如有非違糾察啓聞一依古制施行兼任宗學又令

兼春秋二品以上一人三品以下一人兼之十年一修壻源錄三年續

寫宗室譜牒從之○癸卯電○視事輪對御經筵○甲辰受朝參輪

對御經筵○兵曹啓三軍旗色中軍紅左軍青右軍白青與黑相似謹

稽古制杜氏通典唐衛公李靖兵法曰諸軍掌五旗各准方色赤南方

火自西方金自北方水碧東方木黃中央土乞依此制青色代以碧色

從之○筑前州大宰少貳藤原滿貞致書禮曹曰邇來寇敵侵弊邑

挈我僚屬屯于他邦我 殿下春月即世弟乃嗣位欲啓其賀志而力

不足

世宗憲皇帝卷四十二
微無及若得荷貴國產物之貺將遂其薄禮也仍獻大刀鎧淺黃絲等物答書回賜米一百石白細苧布黑細麻布白細絲綉各十匹雜彩花席十張虎豹皮各二張燒酒三十瓶○乙巳輪對○工曹啓各官客舍公衙辛久雨漏守令未得擅自燔瓦改蓋材木盡腐請自今各官守令以修補蓋瓦之數報于監司監司覈實報本曹啓達移文後以入番人吏日守等閑役人燔瓦改蓋如或守令過數燔瓦以費人力隨即治罪從之○丙午視事知申事鄭欽之啓明年科舉之期上曰文科中一等者即授六品或七品餘悉分子三館以滯閑地及其去官則闕於事情終不爲世用建議者以爲登第者宜並授東旺參外之職取人將以任用也予甚然之欽之對曰搢紳子弟少時爲各司南行者明習吏事若三館權知則數年待次滯於一隅不識世務然年少者猶可習而能也其齒多者終爲無用也並於各司南行叙用爲可左代言金赭曰文科則一等及直拜翰林者外皆以權知口傳武科則二十八人即皆叙用文武實異矣上曰文科學習甚苦武科功夫最易故雖盡用登文科者以勸之習射御而趨武科者必多矣待左議政還更議以啓遂傳旨吏曹曰文科出身者並於各司南行叙用○上謂鄭欽之曰前日講

武死者頗多予不得聞見歎於左右故其後講武令曰各司人死則罪率領者私奴死則罪其主今亦專不聞有死者其細推死者以啓○御經筵○刑曹啓黃海道強盜新白、姜豆彥洪得希洪上左洪石伊律殺處斬金萬雖不與爲盜然知情分財請並處斬從之減金萬一等○修城禁火都監啓各坊失火人內老幼廢疾妊婦勿治罪令漢城府收贖從之○禮曹訪京外孝子順孫節婦以啓京城東部人幼學韓允雍大司成黃鉉女壻也性厚直父臯早歿事其母至孝晨而省午而問昏而定問衣燠寒隨節以供衣服一日三進母家雖雨雪不廢其侍側也溫言和色以安母志爲心或得珍味雖少必以饋母若有疾必嘗藥以進色憂達曙不寐中部人幼學李成蹊司直元之獨子也不離親側怡色柔聲出告反面晨昏定省不敢違志親得疾經年成蹊不食甘肯憂念不弛旁求藥餌盡誠治療二親適逝居憂六年一依家禮及返魂成影幘朝夕奉獻不怠薦新物以時誠孝至今如一家失火書籍貲產盡爲所燒先奉影幘以出俾免於火前錄事全忠禮父死寢苫枕塊唯歡糠粥不嘗美味喪畢奉神主朝夕必祭又事其母順志不違出告反面晨昏定省有疾則藥必先嘗如此至老不改京畿長湍人幼學

裴弘是母死不食三日大斂始食粥廬墳三載寢苦枕塊析寒暑雨待墓側終日旌表其門閭及父歿哀毀踰前喪安城人學生宋倫有兄三人倫以季子廬墓三年畢結廬墓傍素食省侍者又四年原平人幼學尹興智父死不食累日喪事一依家禮守墳三年歎粥不食菜果手自炊爨以供朝夕學生林自秀父死廬墳三年歎粥不寢茵席朝夕手自炊爨抱川人前廣興倉副丞鄭冕父母連逝廬墳六年與弟親負石築墻成砌晨夕必哭分奴婢貲產必均不敢以一毫加於己且泣曰生子願有室者父母之心也而二弟俱未得婚何以爲生遂以已所分得貲產土田奴婢加給忠清道大興人學生金順前司正金可畏兄弟也遭父母喪皆適大饑順守母墳可畏守父墳織屨易粟躬自炊爨以終三年溫水人任山壽父母歿日擔土成墳守墳哭泣終六年每遇朔望必祭金羅道順天人幼學鄭江母歿父娶後妻江之家距父家五里許日三往問安雖盛暑雨雪不廢父日掃庭守江每曉先父未起躬自灑掃以代其勞父在未嘗遠遊每鄉人宴集過時輒歸勸之留則曰未知家尊安否敢辭耳嘗佩一囊得異味必盛之歸遺其父孝誠終始不懈父死食粥寢苦廬墓三年慶尚道咸昌人金難所居屋僅一間一日失火

其母病不能起難冒火抱母以出俱爲火所爛母三日死難經年得愈
蔚山人生負宋滔父母俱患宿疾侍藥十餘年父母間一歲連歿親
負土石營墳喪制一從家禮不用浮屠法立祠堂以安神主焚香晨
謁以時祭之得新物輒獻宜寧人前司正朴成德年九歲喪父及長遷
葬白衣素食追服三年母年今七十三歲素患風疾成德侍藥不離則
具甘旨以供或因軍務經宿於外則曰母老矣不食魚肉居昌人幼學
劉安年十五父歿身自炊爨以供朝夕擔土石營墳廬居三載終不怠
母死又廬墓三年哀痛如父喪大丘人前散貧張恃父歿既葬七日始
歡粥不食菜果苦塊以居不結廬執炊爨擔土石無不親躬哀慕三年
常如待殯之日母歿又廬墳三載一日夕真有虎來吼略無懼色不去
墓側黃海道白川人韓箕斗執心廬直父歿廬幕三年事母盡孝瑞興
人幼學李甲耕毋歿守墳伐木耕田以供朝夕父又沒連六年廬墓咸
吉道北青人前司直李甫家學生申汝和並居父喪守墳三年平安道
撫山人學生金汝貴父母之喪俱守墳三年歡粥學生李天瑞父死廬
墳得疾方劇不替朝夕以終三年江西人前正設判官朴係以獨子守
兩親墳各三載躬自炊爨供朝夕時至則哭泣盡哀每歲春秋親擔土

加塚京畿安城人書雲正鄭均妻許氏年三十六夫歿守信以居日供甘旨以養其母每遇俗節及已生晨必獻壽癸卯甲辰年間疫疾大熾蒼赤亦卧許氏不畏病具饌奉母如平時已與母俱無恙後母死葬于家北朝夕必祭出告反面京城南部人司宰副正金允和妻李氏夫歿葬于抱川守墳三年京畿積城人節制使洪尚直妻文氏夫歿廬於墓側朝夕上食至大祥暫不離墓側制已終不忍遠離居近里每遇朔望及俗節必祭之忠清道公州人學生朴漢生妻鄭氏年二十夫棄之娶他妻父母欲嫁之不從年三十其夫死父母又欲嫁之又不從洪州人監務李仲贊妻林氏早喪夫守節母歿守墳三年小監朴孟文妻趙氏年三十九夫歿守墳三年母歿又守墳全羅道全州人幼學崔以源妻李氏年十八夫死請于父母葬家側家甚貧賣資產以供朝夕終三年後父母欲奪志日已定亡走舅姑家終守其節及弟金九淵妻李氏年二十六夫歿居于近墓之地朔望必親祭隨母居十三年不進酒肉或時製襪燒于墓前如事存焉南原人戶長梁佃妻年二十八夫歿父母欲嫁之以誓自守不食魚肉葷菜潭陽人學生崔有龍妻年四十四歲戊辰倭寇大至有龍赴內廂防禦妻携二幼子匿巖下草莽中賊劫欲

淫之固拒不從賊以槩刺殺之適隣人匿其傍見而哀之賊退收屍而
葬濟州人中樞院副使李沉妻文氏年十九而嫁居三年沉如京無子
獨居沉歿欲娶者多固守其節旌義人職貢石阿甫里介妻無命年二
十而嫁居九年夫死無子無父母奴隸甘心窮餓求婚者衆終不改節
慶尚道慶州人茶房別監余伯堽妻尹氏年十九夫死無子又無奴僕
家甚貧朔望親奠號泣終制其母欲奪志亡走舅姑家以全其節後服
舅喪三年不怠至今奉祀黃海道谷山人知郡事李台慶妻姜氏年二
十九台慶歿三年後四時祭享必誠判事曹允明欲娶之斷其髮不從
象山君之子姜鎮又欲娶之及門亡匿又斷其髮親屬屢禁即如京以
之乃還供時祭如舊平安道陽德人幼學尹元常母年三十二夫死服
喪三年每遇朔望祭不離墳側哀號有六子皆幼身親薪水之勞零丁
獨居母與親族強欲奪之固拒之養姑二十年至孝姑歿軒衰三年繼
山人記官乙奉母年三十二夫死喪三年畢母與親族欲奪志不從母
年八十九奉養益虔夫死二十年每遇忌日輒被髮痛哭高州訓導官
尹統方在孩提父死及長每以不及事父爲恨事祖父如事父閔祖父
年老侍則日短辭職歸晨昏定省常不離側奉養務適意及歿哀號不

己廬墓傍蔬食二年時祭盡誠敬事之如生焉命下吏曹○戊申輪對御經筵○平安道監司權蹈上箋謝賜表裏箋曰臣竊伏惟念海青一事既奉親諭又奉內教恐或不稱常切于中遂將捕獲條件論諸境內無不悉知時加發摘以考勤怠庶幾人人樂於捕獲而弊不及民以彰

陛下事大之誠愛民之仁感徹天地之致然臣何功之有哉豈意非常之寵眷及無狀之愚驚駭無措罔知所言且臣質本多病又於本月十五日發刺痛困倦不食之病其勢轉篤幸蒙 殿下命醫賜藥得至今

日病勢稍輕乃有生理再生之恩昊天罔極又竊自念久以無能濫蒙 殿下覆育之恩常心自誓不知死所况今異渥沓至將何以報臣謹

當庶保病餘之殘喘益効平昔之孤忠奉揚仁厚之風衣被一道恒祝聖壽之永願獻萬年○左司諫金孝貞啓補充軍之設國家美法歲乙未始令二品以上賤妻子限五品受職三品以下賤妻子以次限職此

祖宗之成憲也若許補充軍爲甲士則初授八品積以仕多馴至過品其弊不可遏也雜色補充軍尤其賤者也若並爲軍士則非徒有過品之弊將與兩班婚媾以亂尊卑之分矣 上曰前朝賤妻子與奴婢無異 祖宗始推親親之義立各品賤妻子授職之法授職既有限品

雖爲甲士二品之子豈過五品三品之子豈過七品以亂祖宗之成憲乎○十一月己酉朔受朝祭視事儀禮詳定所啓大小人負行時祭許著紗帽上曰前銜亦可著公服乎判府事卞季良曰二品以上雖前銜詣闕則著金帶紗帽故祭時亦可著紗帽金帶三品以下前銜則不得著紗帽銀角帶至祭時而著未可若令著之則與二品以上一例恐無尊卑之分上曰自今前銜行祭時二品以上則許著金帶紗帽三品以下著烏角帶紗帽○上謂卞季良曰議者以爲文科三人外皆以權知口傳三館待次叙用至七八年乃得去官故老於一館不習世務其他貴家子弟則自少分列各司南行明習吏事終爲可用之才此言然乎季良對曰誠然上曰予亦然之季良曰文科三十三人即皆叙用已載元典若用此輩爲各司南行勝於貴家子弟矣然臣竊料文科皆用於各司南行則貴家子弟有不見用之歎議者亦或以爲取文士專爲文學不宜用於南行上曰取士欲爲世用豈獨爲文學耶季良曰上教甚善貴家子弟其父母寵愛之使英明可學之輩未免弱冠已列於各司南行不學文字不達事理深可惜也宜使貴家子弟盡赴臺待其通義理就德行然後漸以入官以三館權知用之於各司南行

如是則子弟無躁進之弊儒者舊適用之才上曰子弟之事予亦聞之
久矣尚未施行吏曹判書李孟昉曰臣祖入朝登第見其榜目即皆叙
用刑曹判書金自知曰前朝中文科者皆差外方司錄臣父亦入朝登
第即授丘縣丞上曰卿之父不知中華之語故除丘縣丞自今三館
擢知吏曹隨窠闕叙用○輪對御經筵○左司諫金孝貞上疏曰臣
等前以順成君謚不可率伴人再瀆上聰未蒙俞音聞命以後夙夜
思之其率伴人大爲不可太宗嘗教禋曰汝之子豈可來京其爲垂
訓深切著明證之受爵祿居京城曾不敢望乃何殿下不念太宗
之教但徇友愛之情至賜伴人以開檢小嫌進之端乎此臣等所以請之
再三而不能已也伏望殿下思太宗之明訓念通言之必察命收伴
人以杜私附之漸不允○庚戌輪對御經筵○司憲府掌令趙克寬等
上疏曰近者順成君謚亦依宗親各品命賜伴人本府諫院屢疏申請
輿收成命未蒙俞允臣等竊思讓寧大君提得罪君父義絕宗社不
得序於宗親明矣殿下持加友愛不忍斷之以義對之爲君俾列宗
親使處國中出入禁闈乃至講武亦令侍從既有乖於太宗處提之
制禋在太宗之時猶逃禁防之外私通外人屢干邦憲豈可又賜謚

私伴以開媒進之路乎亦非保全之道也伏望 殿下斷以大義命除私伴以嚴禁防不允○辛亥視事 上謂右議政孟思誠曰今 皇帝出征北方遣人欽問起居何如將待回駕欽問乎昨日卞季良言須及時欽問思誠及判府事許稠等對曰不可愬然須亟欽問命更議以聞○輪對御經筵○吏曹啓宣德三年五月初二日兵曹受教諸處牧場置監牧官考馬匹孳息之數以行褒貶而獨於濟州牧場革監牧官未便宜依他道例置監牧官然無驛丞可兼任者且於海外別遣監牧亦有弊請濟州監牧官令本州判官兼之旌義大靜以其官守今兼之從之○刑曹啓醴泉人張永已婢夫都羅大奸其主妻內隱之請依律絞都羅大杖內隱之一百贖流三千里 上曰都羅大常與家長之妻共爲鋤禾春杵之事因與之通此必賤者之家都羅大之罪似爲可恕然律云雇工人奸家長妻者絞若以賤者而寬之後復有如此者依律抵罪則用法不均當依律文斷罪以戒後來遂依所啓○壬子輪對御經筵賜毛衣毛冠于代言等○命戶曹給壓石致死隊副金有德米豆并五石紙五十卷○刑曹啓鳳山人楊石老妻夫隱伊與奸夫嚴金擊殺石老請依律夫隱伊凌遲處死嚴金處斬從之○平壤通事康智恂回自遼東

傳寫詔書以來詔曰恭天撫民固無夷華遠近之間除殘去暴本於帝王仁義之心故拔稂莠所以育苗而斬蛇虺爲其傷物善善惡惡明聖所同朕嗣祖宗之鴻圖主萬邦之兆庶志存康濟夙夜惟勤比以殘胡嘗爲邊患爰於農隙躬歷強陸飭勵將士嚴固防守九月初二日駐師石門遽得邊報胡寇數萬南侵豕突獸奔已迫近境朕躬率鐵騎三千馳赴之將士比力協心咸奮一當百斬馘虜首萬餘級擒其酋長百餘人經擣其巢穴盡獲其人口兵器馬匹牛羊輜重不可勝計腥膻蕩滌邊境肅清遂班師振旅於戲稔惡不戢醜虜何遁於天誅武威載揚佳兵豈予之所志庶幾攘夷之績用副保民之心詔告中外咸使聞知○癸丑輪對御經筵○親傳冬至祭香祝○甲寅 上率世子及百官行冬至望闕禮御勤政殿受群臣賀禮○設內宴宗親等入侍 中宮亦宴于內賜二品以上宴于議政府○賜咸吉道節制使河敬復一表裏慶源李澄玉鏡城柳衍之衣各一襲以捕海青也○乙卯輪對御經筵○以柳思訥爲藝文大提學曹致漢城府尹李叔畝元胤中軍叅制○戶曹據量山敬美官呈啓大小人負墳墓基限洪熙元年五月日受教後葬於自己田或換易田隨其品限種木陳荒之地亦勿并打量從之

○丙辰輪對御經筵○上率世子及百官拜賀節日表箋○節日使韓
惠并賚進獻乾年魚二千尾大口魚一千尾年魚子十瓶大文魚三百
首以行賜惠毛冠及衣笠靴○差上護軍崔雲管押被虜唐人閻赤等
二名解送遼東○丁巳視事 上謂代言等曰叅判李明德還自義州
言昌盛見黑狐白鴈曰此皆瑞物天下必來賀予考歷代黑狐白鴈白
雉皆非瑞物也周時獻黑狐隋煬帝時亦獻黑狐且麒麟或出盛世或
出衰世以此觀之祥瑞不足信也然尹鳳言今皇帝酷好祥瑞至於白
鼠白兔皆令馴養而翫若見今進黑狐白鴈海青則必深喜矣嘗聞仁
宗皇帝時麒麟出遊山谷間兩鹿先導群鹿從行時未獲之圖畫於紙
爲物甚異此則祥瑞也 太宗皇帝時麒麟出於野獲而養之左代言
金赭曰臣聞麋身牛尾馬蹄然後謂之麟出於太宗時麟者其蹄似牛
上曰然大體似麟甚奇異謂之麟可也○輪對御經筵○兵曹啓今
考都試格例能射取才長箭二百四十步一次三箭中者八分及者七
分過者每五步加一分百八十步一次三箭八十五步一次三箭中者
七分片箭一百八十步一次三箭中者五分騎射二次各三的中者每
一箭加五分擊毬馬手俱快備勢三回能擊出毬門者為一等給分十

五馬手俱快備勢三回雖不擊出毬門能擊行杖者為二等給分十馬
手俱快備勢二回能擊出毬門者為三等給分五而多分畫者為一等
超一級賞職二等給到一百五十三等給到一百能槍取才二次勢俱
中勦人六者為一等中五人者為二等中四人者為三等一等超一級
賞職二等給到一百五十三等給到一百能槍一事取才者以能射三
才之例賞職給到未便請自今都試取才時槍准二百四十步除二次
而一次勢具中勦人每一給七分其餘一百八十步八十五步騎射片
箭擊毬等事以他例試取其等第及賞職給到則能槍能射共計施行
從之○兵曹啓前此三軍甲士入直及行幸時各其領護軍領率糾
察宣德二年六月日受教上大護軍護軍一處入直唯各領牌頭領率
因此考察不嚴又於行幸時護軍不領率尤為未便請自今依舊例三
軍甲士入直及行幸時各其領護軍領率考察唯上大護軍一處入直
從之○兵曹啓各色補充軍唯月差所專掌役使十司則曾不役使
故雖有不立役之日未得悉知實仕日月頗有差錯自今補充軍立役
日及不立日數月差所明白置簿其不立日數隨即移文屬司至都目
時各其司上大護軍護軍與月差所護軍磨勘報曹以為恒式從之

○己未 上率世子及百官行賀千秋禮○視事輪對御經筵○知申事鄭欽之啓許稠語臣曰前已獻海青三連達子塞路故未得赴京今又送海青二連似爲未可且獻海青非所以輔 帝德也嘗念高麗之季始有處女之選其弊流至今日况海青捕獲最難緣此外方之民搔擾莫甚又嘗聞大金播遷實由鷹子之故臣愚以爲當時路旣未通且已獻三連今姑不獻二連何如 上曰此言然矣然 帝諭予捕海青以進予既得之不進於 帝而留予宮中其可乎雖女孩兒與數萬匹之馬尚不得已而獻之况已得之海青其可不進乎予之宮內使喚官豎亦多入朝侍左右我國之事何所不知予既爲 帝而捕之不即進獻予心未安且 帝若曰前諭海青何以不進乎則予將何辭以對今 帝素好鷹犬豈因我國之獻然後至於失德乎○庚申御經筵命左代言金赭曰文章正宗楚辭等書學者不可不知其令鑄字所印之○輪對○進鷹使上護軍李烈賚海青三連陳鷹二連乾年魚貫脯年魚各一千尾年魚子十瓶以行賜烈毛冠及衣笠靴鷹師二人養鷹三人衣笠靴○辛酉流星出羽林入南方天際狀如拳赤尾二尺許○輪對御經筵○壬戌視事贊成權軫啓都羅大非內隱之婢夫乃義母婢

夫也且與內隱之常同賤事今論以死刑可疑 上曰設使有奴婢一
二口而不同賤事者其婢夫犯此罪則處死獨此人以常同賤事而免
死則一死一生其間大相遠矣若有可生之理則免死可也更議以聞
○判府事許稠啓五部學堂惟西部學堂本是僧舍僻在白岳西洞教
官與生徒往來稍遠請擇閑地構之 上命戶曹判書安純曰營此學
堂卿其掌之○親傳望祭香祝○輪對御經筵○傳旨禮曹自今靈寶
道場三界大醮神殺醮及塹城醮行香使勿遣代言以二品以上差定
○漢城府啓允私奴婢無後者以其家產既許他人其本主又爭之今
考永樂十二年七月十二日刑曹受教奴婢無後身死者如有兩使奴
婢許本主使喚有文契者不在此限請并家舍貲產依奴婢例決給從
之○癸亥輪對御經筵○甲子受朝祭視事輪對御經筵○禮曹啓謹
按文獻通考唐制一品以下時享主人以下公服文公家禮正至朔望
則參注主人以下盛服允言盛服者有官則幘頭公服帶靴笏進士則
幘頭欄衫帶處士則幘頭皂衫帶無官者通帽子衫帶又不能具則或
深衣或涼衫本朝元典大夫士庶人時享祭儀不言冠服請自今凡有
官者時享皆著紗帽品帶從之○乙丑輪對經筵○前將軍徐淑顛狂

人也自斷左手以雜畫一軸書簇三軸雜書二冊授其子學智送于刺
府事下季良季良以啓其書不成文理荒誕妖妄命囚義禁府問之淑
自言嘗絕穀見性以心得之要成書及簇願進上斷手以著誠意命從
願安置勿令飢寒○丙寅輪對經筵○丁卯視事判府事下季良啓曰
上至誠事大獲海青輒獻然昔者未易捕獲今則獲者稍多請擇善以
獻勿多進且其捕獲甚苦又安知後日未能多獲也倘有多獻之命則
何以待之 上曰帝若聞多捕而不盡獻無乃不可乎○上曰浩弓無
如水牛角予欲請於上國置之全羅道不寒之地兵曹判書崔閔德對
曰臣近日都試武士見弓之脫弦數矣而不折皆水牛角也左議政黃
喜曰水牛毛薄畏寒方冬築宇善養之則可生然買來其難若請之則
帝豈不許 上曰予亦以爲請之必得買來則難矣○輪對經筵○檢
漢城尹金延祐母年過百歲而死賜米豆并十石○平安道都體察使
黃喜與都節制使同審各官城堡虛實及各官合入便否以啓安州邑
城周回一萬四千二百八十五尺今皆頽落城基過大守禦爲難故今
尺量減築處新舊基并九千七百七十五尺其低微不實處今皆改築
以肅川价川順川永柔等官人民入保价川郡朝陽土城基周回一萬

一千三百九十三尺外面多平夷內面則城基高峻數峯高大平地陝
隘人物可居處甚窄若值旱乾冰凍則必有水泉不足之患价川郡大
林寺洞新城基周回一萬二千八百九十尺南面平地八百九十尺北
面低微處一千一百五十尺東面低微處四百尺其餘則皆土山外面
高峻內面平地寬廣亦無水泉不足之患堪為邑城然城基過大且安
州及藥山城相去不遠守禦人物力分難支撫山地藥山城周回二萬
八千三百二十五尺乃義州朔州江界直宿之路三道中央也城基外
面四方巖石高峻內面土地寬濶亦宜當邑南東門道本平易若於此
門除治道路則軍馬出入為易實是天作之基且乙未年造築後暫不
頽落宜加築低微處且修城內巡城之路合撫山延山為一州稱大都
護府置府使判官以都節制使兼任府使但城內外之田膏腴者少鄉
吏日守官奴婢等常在官門居計實難近城十里新來各戶宜限年減
租鄉吏則期以富盛除遼東騎載之役以厚其生且依平壤府例量設
土官使邊民樂於趨赴以成巨鎮以泰川熙川嘉山定州雲山博川朔
州德川孟山等官人民入保雲山郡青山城周回一萬六千九百九十
七尺城之内外險阻出入為難故宜令老弱男女入保避難但城內平

地甚窄軍馬難於出入以理山昌城碧潼等官入保熙川邑城古基周
回六千四百二十尺今尺量減築處新舊基并三千九百三十六尺視
年豐歎量民勞逸以石改築自此向江界之路狹餘合排防墻古基及
向理山之路棘城防墻古基極爲阨險可以一當百乞并修築又於其
內連設小堡以爲訶候者所依江界閭延則本是極邊四無救援之兵
脫有大事則當舉邑逾嶺退保熙川城宜以江界軍糧量除一年經費
及凶荒斂散之用其餘則每年納于熙川城熙川軍資亦當量宜納于
藥山城平壤府邑城以江東三登祥原中和江西龍崗三和咸從甌山
順安等官入保慈山郡山城以殷山成川陽德等官入保郭山郡能化
城以隨川宣川等官入保龍川郡邑城以鐵山麟山定寧義州等官入
保上項各官合入城子並依舊以合入各官每年軍資之數分程途遠
近量宜轉輸餘悉納于其官城子以備居民凶荒之資從之○戊辰輪
對經筵○通事盧福龍馳書報使臣金滿出來○己巳視事輪對經筵
○遠接使金自知教行○刑曹啓安東人無作金妻加隱知淫奔被獲
還家乘夫睡以斧擊殺律該凌遲從之○元尹正尹等啓前此宗簿寺
合于在內諸君府以本寺奴子定爲臣等驅口今宗簿寺別立衙門驅

口皆下本寺請以各司奴子定給命依所啓三品給二名四品一名○
庚午遣宣慰使禮曹參判金孝孫于安州○辛未御經筵○司諫院啓
兵曹堂上及正郎安完慶佐郎許詡等以副司正李萃加資爲進勇請
罪之并劾右議政孟思誠知兵曹事鄭淵命囚完慶詡于義禁府鞫問
尋釋之○刑曹啓江西人池仲萬妻古音珍與其女祿只疾仲萬娶後
妻謀殺之誣告仲萬強奸祿只請依律並斬母子從之○壬申御經筵
○司憲府啓前仁壽府副丞金士忠贈李原文契云政丞向我懇勲護
濟故贈以婢同加伊李原酬贈士忠文契云君向我情厚贈之以婢故
我亦贈奴婢二口今劾之則原之奴婢士忠暫不役使而贈婢未幾得
拜副丞以此觀之原以同加伊作妾之後士忠見勢遂贈求媚要官原
旣受贈內不自安詐稱酬贈遂成文契及原受罪之後士忠無復顧望
欲還其婢反稱酬贈奴婢不實其心之回譎甚矣事在赦前雖未治罪
請收贈婢後監受職牒屬其贈婢于主掌官從之○癸酉御經筵○甲
戌月犯心星○御經筵○禮曹據日本通信使朴瑞生手本啓大內殿
自其先世誠事我國禁制賊倭戊子年通信副使李藝遭風漂到石見
州幾死大內殿盡心救護給糧米四十石船價錢一百貫粧船護送每

當本國使臣之行於賊路要害之處悉令護送今乃奪據九州搃領諸島非他酋倭之比若小二殿則失其本土寄生翁池地且今已厚賜糧米雜物請以賜小二殿之物移賜大內殿加賜豹皮一張虎皮二張細紬苧布各五匹彩花席五張命大內殿所送物件依所啓加數小二殿賜送之物亦依舊例贈之○禮曹啓小貳殿使客將告還上曰通信使之行當贈禮物于小二殿禮曹判書申商對曰小二殿所居非我國使臣經過之地且前者厚贈使人以送亦足矣上曰日本諸處皆贈信物獨小二殿無之雖非經過之地無乃未安乎商曰小二殿曾征三島有大功於我國今宜贈信物○司憲府啓女牧丹之罪不干奸事死罪漢城判官閔麟生枉囚之及本府取辭拒逆不服請移他司上曰本以公罪而不承阿曲甚矣遂下義禁府鞠之義禁府啓麟生抗拒之罪宜杖八十命減二等○上曰今賜世子六梁冠特加等級實萬世之寵也將何以謝息乎昔帝賜太宗冠服母后段子於其謝息進金鞍二部及馬匹又太宗嘗曰金非我國所產雖無金鞍可也何以處之判府事卞季良對曰等級之加與爵命同此是特恩也須進金鞍以表喜謝之意上曰然可令工曹預備○乙亥流星出北斗南入大

角西○御經筵○丙子太白晝見○御經筵○丁丑御經筵○詳定所
提調星山府院君李稷等撰六典五卷謄錄一卷以進箋曰自古一代
之興必有一代之治大經大法雖百世而不易所損所益各因時而變
通恭惟我太祖康獻大王受命造邦日不暇給而立法定制規模已
具時則有若臣左政丞趙浚等編集自國初至丁丑年間法令制度分
門類聚名曰六典布置施為綱舉目張厥後左政丞河崙等又撰續典
頒行中外俾有遵守永樂乙卯秋八月太宗恭定大王諭禮曹若曰
續六典內更改元典者其悉削除如不得已存之者註於元典本條之
下第以因仍不克成書是以或相違戾或頗重複士庶懵於同異官吏
眩於奉行惟我主上殿下萬機之暇留意典故申命臣等共加修撰
臣等欽承明旨將續典內更改元典條畫一一削除哀集戊子以來條
例類附續典之中其更改增補元典者互註於元續典本條之下各平
受教互相發明可合為一條一時權宜非經久之法則別為
篇目以六典謄錄撮其綱領芟其重複要使坦然明白可考而徵勒成
不刊之典庶為垂世之規伏望殿下上師帝王近法祖宗執之堅
如金石行之信如四時挽回世道以登至治實廟社無疆之休上

覽之猶以爲未安命河漢等改撰○十二月戊寅朔御經筵○己卯御
經筵○吏曹啓請合平安道延山府及撫山縣稱爲寧邊大都護府置
府使判官以都節制使兼任府使從之○司憲府啓注書金光晬邀客
會濟生院招致伶人娼妓借禮賓器皿私用茶餘酒味且發承政院牌
令長興庫進茵席器皿致庫奴暴死罪當從重杖一百注書禹孝剛同
議會飲又借與禮賓器皿少尹鄭奉卞孝文正郎李壅具綱署令李師
孟金何注簿張厚奉教李伯瞻正字曹彙副錄事周恂等參會並答四
十止言盧尚志監察李活參會之罪不宜與常負例論各杖八十禮賓
錄事李升忠聽光晬之請借與器皿答五十伶人良衣金詐傳代言司
之言率妓而往杖一百命依所啓光晬功臣之子只收職牒良衣金減
三等綱孝剛功臣之後勿論○庚辰御經筵○咸吉道都節制使河敬
復上箋謝賜表裏○吏曹啓三丁一子受陳省以老病未得從仕者依
曾降教旨公子代已從仕至去官授其父職其餘子等亦免鄉役未便
請自今老病令子從仕者只許其身去官從之○辛巳御經筵○以洪
海爲唐城君元閔生左軍都摠制閔審言同知敦寧府事趙留右軍同
知摠制洪汝方漢城府尹曹致大司憲李孝良僉摠制李賴左獻納楊

繼元右正言孝良和英之子也曾爲崔湜女督湜子仲基娶檢漢城俞
龜壽之女甘同甘同恣行淫奔孝良通焉坐此罷職 上以父祖有功
不數月除上護軍其後孝良不悛肆爲禽獸之行妻梁氏與妾妬孝良
打梁氏于路人皆鄙之至此驟登峻狹其不稱甚矣○以漢城府尹洪
汝方爲慶尚道都觀察使○吏曹啓平安咸吉兩道視他道爲遠故若
除居他道者爲教官則率憚離家托故不赴自今雖未中國試年滿四
十自願者許赴本曹講四書一經中者置薄待窠闕充差其居兩界附
近黃海江原道者令差使負講四書中者叙用從之○命刑曹緣坐被
罪外方從便者之子並許京外任便居住○壬午輪對○賜賻嘉懿翁
主母米豆并十石○癸未視事 上謂代言等曰議者欲復東堂講經
之法然已熟議而行不可復立也但學者不讀經書徒習抄集甚不可
也試場挾冊及偶語者一禁若犯則黜之如是則通經書者其製述必
合本旨不能者反是其下禮曹與卞季良議啓○戶曹據平安道監司
關啓鐵山郡新築架山城其四面高險便於應敵然城中狹窄地皆沙
石路又險阻樵採甚難古邑則距架山二十餘里儻有緩急必不及入
保守城爲難寧朔古城則距架山五里而地且沃饒勢宜置邑請仍置

架山國庫而以本郡軍人之不赴防義州者守護之其官客舍及人吏
奴婢等悉移寧朔古城命下政府諸曹同議參贊盧開判書李孟昫申
商吳陞安純贊成權軫左議政黃喜等皆曰可參判崔士儀李明德判
書崔閏德右議政孟思誠等皆曰不可從喜等議○司饗房生鮮千金
浦人吾乙麼大等七名因捕魚溺死命依船軍例致賻復戶○傳旨刑
曹黃海平安道各官守令推鞠咀呪逮繫人等或不用心以致累朔滯
獄其推鞠以啓○甲申進賀使元閔生副使曹致等奉勅書而來上
率世子及百官迎于慕華樓至勤政殿行禮勅曰所奏世子冠服具悉
今賜世子六梁冠一頂永爲定制至可領也百官進賀賜閱生鞍馬及
奴婢五口田五十結致鞍馬及奴婢三口田三十結書狀官金退之通
事裴蘊唐夢賢等田各十結御慶會樓下宴慰閱生等 王世子及宗
親駙馬政府六曹判書六代言入侍饋從事官等于賓廳○日本通信
使大司成朴瑞生副使大護軍李藝書狀官前副校理金克柔發行賀
新主嗣位致祭前主書契曰今因九州來使乃知新膺景命以正位號
不勝欣慶爰遣臣成均大司成朴瑞生大護軍李藝往致賀禮不典土
宜祇表寸忱切希領納惟貴國與我邦世修舊好未嘗少渝今善繼善

述益敦信義以求終譽豈非兩國之幸歟禮物鞍子一面黑細麻布白
細苧布白細綿紬各二十四匹人參二百觔虎豹皮各一十領蘭草方帝
滿花寢席各一十張松子五百觔清蜜二十斗祭文曰嗚呼惟靈好善
有誠保釐桑域以育民生昔嘗修講以信以睦發遠俘虜且禁草竊謂
當永世愈久愈篤豈意一朝幽明奄隔計音初至不勝痛悼山海阻脩
末由邊吊聊薦薄奠辭以叙哀靈其不昧諒予至懷祭具白細苧布黑
細麻布各二十四匹禮曹致書對馬島宗貞盛曰今我 殿下聞日本殿
下嗣位遣使致賀惟撥船護送賜米二十石白細絲紬白細苧布各三
匹雜彩花席五張致書左衛門大郎賜白細苧布五匹燒酒三十瓶致
書九州西府少貳藤公及九州都元帥源公等各賜白細絲紬白細苧
布各五匹彩花席十張豹皮一張虎皮二張致書一岐州志佐源公及
佐志各賜白細絲紬白細苧布各五匹雜彩花席十張致書大內多多
良持世賜白細紬苧布各十匹彩花席十五張豹皮二張虎皮四張○
賜瑞生藝各段子衣一襲紬衣一襲別賜衣及笠靴賜從事官等衣○
丙戌流星出北斗入柳北狀如拳色白○視事輪對經筵○命給盧尚
志李活等職牒○忠清道監司啓公州住前教導林道經明行修不求

聞達家廟之法未行而已立祠堂出告反面終始不渝初與其妹分奴婢後妹之奴婢盡逃散道憐之分已奴婢與之又聚鄉閭子弟教誨不倦連山縣住生負黃陸杜門讀書無求於世事親以孝非但心行之高亦有才智之美請不次擢用以勵士風命下吏曹○禮曹啓義州朝廷使臣往來之所而無訓導譯語之法通譯語者甚少請依平壤府例置譯學訓導聚本州及隣近各官自願生徒教以漢文漢語擇其成材者量授平壤土官從之○上林園啓本園自丙午年種楮于藏義洞以造進獻表箋紙然所植本少不足於用地且沙石非長久之計請於留後司破毀寺杜基地及公處閑廣良田栽植并植諸般果木以資國用本園一負往來與留後司祿官考察又京中果園只用昌德宮西窄地故諸種果木未得廣植國用不足請於衍禧宮長生殿蓮花院基地并植之又江華府四面環海水氣所聚草木盛長勝於他處請栽柑子柚子石榴木瓜等諸種果木從之○禮曹啓賤女嫁良夫者私賤則告主公賤則告官已有成法今不告主而嫁良夫者頗多請皆屬公上曰屬公未便自今但以教旨不從論罪可也更磨勘以啓○左衛門大郎遣人獻土物○丁亥輪對○戊子受朝參視事輪對○慶源等處兵馬

都節制使李澄王鏡城郡事柳衍之等進箋謝賜衣服○傳旨兵曹自
今武科及武藝考閱侍步射八十五步除五步只用八十步○己丑輪
對○庚寅御思政殿宴慰漢原君趙璿仍打毬饋洪師錫及六代言于
賓廳以璿師錫等赴京回還也○賜刊性理大全及經書大全人米穀
有差○辛卯視事○親傳望祭香祝○九州宗金致書禮曹曰竊承大
國差行人將吊我喪時氣向寒遼海萬里風濤不穩待春發船不亦宜
乎此一事也方今九州威權在大友與大內二公若先遣行人通好於二
公二公必傾倒焉此又一事也小人沐息渥已久苟利於大國力能爲
之故敢以二事私於足下仍獻土物且論大友殿求田犬之意回賜正
布一百四十七匹田犬二隻藤原滿貞遣人來獻土物回賜正布十三
匹宗彥七盛國致書請還被留人仍獻土物答書刷還十六名回賜正
布十四匹○賜賻和義翁主米豆并三十石紙八十卷○刑曹啓槐山
因許忠與崔吾乙未有宿嫌忠路逢吾乙未將殺之吾乙未固拒忠妻
冬白執吾乙未衣共殺之律該處斬從之但吾乙未與忠聞則妻有救
援之義其減冬白一等○壬辰兀良哈指揮伊孫可等十四人斡朶里千
戶蒙古道等四人來獻土物○慶尚道龍宮尚州善山聞慶開寧咸昌

等官地震○癸巳輪對○甲午以刑曹叅判李明德爲京畿都觀察使
○乙未 上率世子及百官齋宿于昌德宮○平安道郭山郡進白雉
○丙申 上詣文昭殿行別祭 王世子亞獻○丁酉 上詣廣孝殿
行別祭 王世子亞獻○輪對○遣宣慰使都摠制元閔生于留後司
○咸吉道阿木河住幹朶里權豆遣千戶原時無等三人童猛哥帖木
兒遣指揮也吾乃等五人馬佐和等三人愁州住兀良哈千戶巨乙加
介等二人於虛茂等二人甫邑同谷等八人來獻土宜○以金孝貞鄭
麟趾並爲集賢殿副提學柳孟聞申包翹左右司諫○吏曹啓司譯院
漢學前銜權知生徒摠一百三十人迺兒職七別學十三人迺兒五蒙
學前銜權知生徒摠十八人迺兒二倭學前銜生徒摠二十七人迺兒
一上項諸學迺兒職多少不均且漢學別學習業無異而分爲兩途尤爲
未便請自今漢學別學勿別給迺兒和會取才以次叙用從之○戊戌
上率世子及百官拜進賀謝恩表箋進賀使大提學柳思訥副使同知
敦寧閣審言謝恩使都摠制朴實副使摠制李叔畝等賫行進賀表曰
帝德廣運覃被寰區我武惟揚廓清沙漠捷音彙達慶頌交騰欽惟協
舜聰明齊湯勇智仁敦化育車書混於多方運撫盈成聲教冒於日出

豈期喙息之類久畜跳梁之心嘗自蟻聚於荒陲今乃獸奔於近境爰
整三千之旅昭示天威聿擒數萬之徒悉平獷俗干戈載戢夷夏咸寧
伏念幸際昌辰欣聞盛事迹拘青社班雖阻於鳧趨目注丹霄誠倍彈
於虎拜方物表曰綏靖寰區開大平於萬世克燔醜類致來貢於多方
謹備黃細苧布二十四匹白細苧布黑細麻布各五十五匹人參一百觔松
子三百觔雜色馬二十四匹右件物等製造匪精名般甚寡豈足充執壤
之禮聊以表獻芹之誠進 皇太后禮物白細苧布紅細苧布黑細麻
布各二十匹 中宮禮物白細苧布紅細苧布黑細麻布各二十匹箋
曰聖神御天武功載集元良二極輿望惟隆允屬照臨悉均蹈舞叢雨
胡寇邈處邊疆不思綏撫之恩敢行剽竊之計赫怒整旅迅掃一方之
腥膻矣凱班師益臻四海之亨泰恭惟職膺主器德協承祧爰當氛侵
之消茂迓禎祥之至伏念幸逢熙運欣聞捷音阻叅趨賀之班恭上壽康
之祝禮物白細苧布黑細麻布各二十匹人參五十觔雜色馬四匹謝
恩曰大度包容懷綏既洽至恩優渥眷顧深隆糜粉難酬佩銘曷已惟
冠帶等威之辨係上下名分之嚴是具情由而勤敷奏敢意陪臣之返
邊蒙寵典之頒一札明綸昭示聖謨之密勿六梁元服煥加賤息之愚

蒙豈惟今日之榮觀實為永世之定制洪私若此前昔所稀茲蓋道擴
蠻夷仁敦字小謂弊邦久被垂衣之化憐微臣常存補袞之誠遂令屢
質獲霽殊澤臣謹當嘉與父老恒祝壽於齊天誓至子孫益輸忠於執
壤方物表曰天眷悉深特承寵命土宜雖薄聊効謝忱謹備鞍子二面黃
細苧布白細苧布黑細麻布各五十匹黃花席滿花席雜彩花席各二
十張滿花方席滿花簾席各十張人參松子各二百觔五味子一百觔
雜色馬三十匹右件物等製造匪精名般甚少敢充旅庭之實庶修執
壤之儀進 皇太后禮物白細苧布紅細苧布黑細麻布各二十匹滿
花席雜彩花席各十張 中宮禮物白細苧布紅細苧布黑細麻布
各二十四匹滿花席雜彩花席各十張箋曰位尊二極允協天心恩導中
宸覃施海甸撫躬無措銘骨何忘伏念臣猥以庸資端逢盛際職縻荒
服惟勤執壤之儀補乏纖毫徒切欽天之懇何圖六梁之冠服特加三
尺之童蒙感與愧并榮非望及茲蓋英資土裕偉量淵冲承眷愛於兩
宮繫歡心於萬國遂令賤息獲荷鴻私臣謹當恪守鯁岑益謹藩宣之
職誠馳鶴禁恒申頌禱之辭禮物白細苧布黑細麻布各二十四匹滿花
席雜彩花席滿花方席各一十張人參五十觔松子一百觔雜色馬四

匹賜思訥等毛冠及衣笠靴○已亥視事輪對○吏曹啓京中各司褒
貶時兼任他務者只錄他務不分等第故加資遷轉之時難以憑考請
自今本司他務相半仕官者於本司褒貶狀錄其等第專不仕本司者
令他務提調等第從之○戶曹啓金羅道監司報龍安縣得成倉本
因里名爲號今移於咸悅縣皮浦請改以德成倉從之○戶曹啓前承
傳旨外方民戶既例收烟戶米又於造家之地以全實收稅疊徵未可
令與政府諸曹同議僉議以爲有田則有租有戶則有調故本朝因古
制始收常五升布次收楮貨歲癸卯以工商先將已物納官倍徵其價
於民有弊乃除楮貨只收戶米有差然各司所貢之物皆出民戶而泥
古制有戶有調之法又收戶米未便請蠲戶米從之○傳旨戶曹量田
國之重事而或始勤終怠或爭先事畢以致差誤其令各道量田官
吏益勤無怠務要得中○戶曹啓講武時所用酒米請令京畿楊州抱
川漣川鐵原永平等官并三十石江原道平康伊川金化等官并十石
以其官國庫米每年春秋釀酒以爲恒式命各加十石○庚子御勤政
殿受立春賀禮宴于思政殿打毬宗親入侍○辛丑視事○皇親賜祭
使臣迎接儀前期有司設帳殿于慕華樓西北設龍亭褥位於帳殿正

中南向香亭在其前設司香二人位於帳殿外左右設殿下祇迎位於帳殿之西近北東向設王世子及群臣位於殿下祇迎位之後近南東向北上備金鼓儀仗鼓樂以伺迎引又於大平館設祭文案于大廳當中南向設殿下幄次于館門外隨地宜其日殿下率世子及群臣時服以常時儀仗出慕華樓使臣將至知通禮引王世子引班引群臣先就祇迎位合班引禮引殿下就位率群臣躬身祭文入幄殿平身使臣至幄殿外下馬以祭文置於龍亭中龍亭出上路司香二人挾持香亭續上香龍亭南向小駐金鼓在前次儀仗次鼓樂次香亭次龍亭次使臣殿下與使臣一時乘馬王世子及群臣鞠躬殿下過行王世子及群臣乘馬隨至大平館龍亭入至大廳使臣奉祭文安於案上通事引使臣就大廳引禮引殿下就大廳東向與使臣相對立引禮贊鞠躬拜興拜興平身殿下與使臣鞠躬拜興拜興平身使臣在東殿下在西行茶禮畢引禮引殿下出就幄次知通禮引王世子就大廳行頓首再拜禮出宗室及文武一品以下以次行禮畢引禮引殿下入就大廳使臣在東殿下在西設下馬宴○兵曹啓甲士居喪終制後還受本職者通計喪前仕到從之○壬寅兵曹

啓三軍甲士每營一千之數已定而並差內禁忠義衛等他務軍士以充其額故甲士隨領者少請以八百差授甲士其餘二百差授他務人從之○癸卯使臣金滿賚賜少卿崔得霏祭文及祭物以來上率世子及百官迎于慕華樓至大平館設下馬宴還宮遣知申事鄭欽之贈使臣鞍馬笠靴及衣一襲馬則以非驄馬不受且曰贈頭目衣服鞍馬吾親授之既而曰吾今醉矣未能分授明日更賚來得霏本水原府吏也以女入朝之故得拜少卿然忘其微賤倨傲無禮○賜酒肉于讓寧大君提○甲辰命知申事鄭欽之問安于使臣仍贈驄馬一匹使臣喜受親分頭目等衣服鞍馬馬則令人馳走庭中科等給之上率世子及百官幸大平館設翌日宴○乙巳差僉知司譯院事趙忠佐管押被擄唐人金保等二名解送遼東○左代言金赭歿賻米二十石大豆十石紙一百卷并賜棺槨又命致祭○丁未中官宴于慶會樓下誠妃及宗親命婦入侍

世宗莊憲大王實錄卷第四十三

十一年大明宣德四年春正月戊申朔 上率王世子及百官行賀正禮御勤

政殿受群臣賀禮 王世子詣大平館見使臣使臣贈鍍金碧玉帶一

腰班白綾巾一幅回贈黑細麻布白細苧布各二匹○命知申事鄭欽

之邀使臣宴于勤政殿及暮 上與使臣御勤政門觀放火炮○金滿

求滿花席及撲頭矢六十箇紅黑草笠各一黑漆櫃五紅狹皮合包十

簇子一雙命贈之但滿花席則答以進獻外市肆所無○已酉地震○

幹朵里千戶豆許阿下忘應乃舍豆女直千戶毛 多好伊里介乃伊兀

良哈千戶古赤甫下凡察伊羅介都波下指揮於夫老百戶夫乙巨等

來獻土物賜衣笠靴回賜絲布七十九匹○庚戌兀狄哈指揮豆稱介

等四人女直指揮於夫老等三人來獻土物賜衣笠靴回賜絲布四十

五匹別賜豆稱哈綠漆紬七匹絲布三匹○以吏曹叅議朴葵為黃海

道觀察使○賜祭儀前期忠扈衛於主人第大門外設欵差使臣幕次

使臣至掌次者引之次司儀引主人以下俱就東階下位西面立哭主

婦以下哭於靈座之後幔下使臣出次立於門西東面執事者陳饌於

使臣東南當門北向西上司儀入告主人去杖免經司儀引主人出內

門止哭迎於大門外見賓先入立於門右北面司儀引使臣入主人以
下內外皆止哭使臣升自東階立於靈前北向執事者以饌升設於靈
前司儀引主人升自西階立於靈右司儀贊上香祭酒使臣立上香立
祭酒連奠祝取 皇帝祭文詣靈左西向立讀訖主人八拜祝奉祭文
出戶盛于卓上銅盤中焚之主人退哭於東階下內外皆哭司儀引使
臣出就幕次執事者撤饌訖司儀復引使臣出復門外位主人出內門
止哭拜送於大門外使臣還主人經杖哭而入○領集賢殿事左議政
黃喜右議政孟思誠等上書曰恭惟 主上殿下以天縱不世之資精
一緝熙之學右文興化教養作人之道至矣盡矣然於 聖心猶且嫌
然以爲未至乃命臣等悉陳興學之方臣等猥以情踈備員本殿承命
戰慄不敢舍嘿謹將一二管見條列于後伏候 上裁一古者公卿大
夫元士之適子皆入大學欲其教養作成以備他日之用也乞今朝官
子孫皆入于學待其學優年至二十五歲乃得從仕其有蔭子孫年十
五以上者除五部學堂升補許令盡八成均窮經學道一文武之用不
可偏廢然古書有曰偃武修文覲文匿武是誠帝王治天下國家之要
道也我 太宗以武科諸事比擬文科者蓋權一時之宜而行之非萬

世之常典也大抵馳馬學射固兒子之所好而豪勢之家爲尤甚焉况復殿試放榜賜蓋賜宴遊街三日加以爵命之榮鼓舞聳動是率一國之子弟歸之於武舉也安有勞心苦思精研經籍之念哉學之不興良以此也乞自今武舉之法一依元六典其鄉試殿試賜蓋賜宴等事並皆亭罷仍講四書若一經庶合古之良將敦詩書悅禮樂之法一前朝有九齋都會課試之法所以鼓舞士子興起斯文之術也文章特達之士比比而出竊意未必不由乎此也乞於五部學堂講學之餘每當六月時散文臣輪日往會命題製述科次唱榜作新士氣其於右文之治不爲無補一內外學春秋課試之法已有成規乞令中外申明政府六曹及文臣館閣二品以上會于成均館或者講經書或令製述以鍊其才以勵其氣其外方各道亦倣此例一竊見 殿下於萬機之暇下慮大學諸生居處之宜飲食之隆優待勸勉之意古所未有然而爲生負者徂於世累不識大體雖繩以法莫肯入學乞令攸司曉諭中外各年生負皆令赴學其或居館累年老不中第者考其禮曹月講分數圓點多小除授京職則庶乎學問之功不廢仕進之路亦通矣一外方各官皆置教授訓導監司考其殿最禮曹課其書徒輒以上聞法亦至矣然徒

有其文莫見其效乞於慶尚左右道各置都會二所每所四十人全羅
忠清道各置二所每所三十人江原道置二所每所二十人黃海平安
道各置一兩每所二十人咸吉道置一所十五人春自三月望後至四
月晦日秋自八月望後至九月晦日擇教授之通經史者生徒之好學
問者聚會養以公廩使勤學問監司守令敦加勸勉庶窮村草澤之士
知所向方而振起矣 上從之但朝官子孫待年二十五歲條則除內
禁衛甲士外一依上書行之其武科條則令兵曹更議以聞○辛亥視
事上謂大臣等曰使臣以 帝命求石燈盞甚勤若果 帝命則不可
不應也使臣之還附副本而獻之乎別遣人偕使臣獻之乎予意 太
祖時或有附使臣進獻之例處之何如左議政黃喜判府事卞季良曰
雖有附獻之例以今觀之似未可也崔得霏致祭其子弟必有謝恩之
行附獻何如 上曰三年之喪天下之通喪也昔 帝致祭李茂昌之
父茂昌喪畢然後入見受職而還然古文有云子即釋服行謝禮若無
親子族親與同里人行之則謝息不可緩也喜季良曰喪畢入見雖有
古例今不當如是得罪之子則方在喪次其壻可行兼賫石燈盞偕使
臣而獻似可命禮曹判書申商擬議以聞 上謂喜季良曰前日疏上

興學條件已聞回話否季良曰臣未聞也 上曰古者卿大夫之適子與凡民之俊秀得入大學今有蔭子弟皆入泮宮則無乃過多乎季良曰京官三品以上子弟皆入學宮可也 上曰文科亦賜牌賜蓋賜宴遊街無異於文科判府事屢言其不可然此 太宗已立之法不可輕改但試取時講四書二經何如喜與季良曰射御之才三千甲士亦皆能之武科之異於甲士者但以講兵書也然不過粗通三四書而已如此而與文科無異故士皆捨文就武今使講四書一經則可矣 上曰授職之事何如季良曰二十五歲則授職可矣今十八歲授職之法始於朴錫命欲除其子之術喜曰此法乃 太宗時河崙等所定也 上曰予亦嘗聞朴錫命爲其子立此法也其餘條件予皆依兄若武科與諸學一例試取則不可也季良曰臣未知一例與否尹淮語臣曰武科乃諸學例也今考元典無放榜賜蓋三日成行之法依舊制何如 上曰予更商量季良曰科場必考經書本文然後得製之今便不見本文則必誦經書然後乃得製述恐無盡治四書五經者也 上曰如不得見本文則學者必致慮矣但以三經命題何如季良曰然且古者有賜脯之禮宋鑑堯前朝史亦載三日大脯之語宜行古制 上曰通鑑亦

載之矣然近年以來禾穀不登且無慶事未敢舉行今於春秋已賜八十歲以上人米季良曰大酺之制古之良法宜速行之○命還給金淇告身○王世子詣大平館宴慰使臣酒八行使臣怒曰執銀瓶者笑我矣乃司彝提舉李宣李季隣也命召責之改其任○兵曹啓前此各領甲士隊長隊副額數均一去癸卯年革龍賁虎牙兩司分屬各領之時各品額數多少不均實爲未便且三軍五負隊長隊副亦或不齊今將各領及三軍額數改正磨勘以聞一在前甲士一千內十司中左領各司直三副司直三司正四副司正十右領各司直二副司直四司正四副司正十副後領各司直二副司直四司正三副司正十一提司直一百二十副司直一百八十司正一百八十副司正五百二十今改正每領各司直二副司直三司正五副司正十并十司司直一百副司正一百五十司正二百五十副司正五百一在前各領隊長隊副一千五百攝隊長隊副六百內中左右領各隊長十隊副二十攝隊長四攝隊副八前後領各隊長九隊副二十一攝隊長三攝隊副九提隊長四百八十隊副一千二十攝隊長一百八十攝隊副四百二十今改正每領各隊長十隊副二十攝隊長四攝隊副八并十司隊長五百隊副一千攝

隊長二百攝隊副四百一在前三軍五負四百十五內中軍司直二十一
一副司直二十九司正三十五副司正五十四左右軍各司直二十一
副司直二十九司正三十五副司正五十三摠司直六十三副司直八
十七司正一百五副司正一百六十今改正每軍各司直二十一副司
直三十司正四十副司正五十五并三軍司直六十三副司直九十司
正一百二十副司正一百六十五一在前三軍近仗二百內中軍隊長
二十四隊副四十四左右軍各隊長二十三隊副四十三摠隊長七十
隊副一百三十今改正每軍各隊長二十隊副四十并三軍隊長六十
隊副一百二十從之○金滿求鞍子二部狍皮合包四鹿皮合包二馬
粧二部天青韉二部黑斜皮海獺皮矢筒各一馬毛網巾一三刀子五
部命與之○慶尚道咸陽珍城居昌安陰全羅道鎮安雲峯等官地震
○咸吉道監司啓曾令築吉州龍城兩邑城子然兩城一時並舉則工
役實難况吉州巨鎮彼人來往糧餉所在且有水患不可無城子其倉
庫館宇及人戶則用州民來春移設其邑城則待秋成稍稔築之從
之○壬子流星出張南入天廟南狀如拳色白○遣內史韓龍鳳贈別膳
于使臣○左司諫柳益聞等上疏曰交隣有國之重事奉使人臣之大

節為使臣者苟不以禮義自守廉恥自勵則辱君命虧使節矣我朝交
隣以道頻遣朝臣講信修好其慮深矣然前比奉命之臣不體上意
貪利重物以辱君命者間或有之思厥所由豈非禁防之未嚴乎況於
奉使赴京之時嚴立禁防猶有干憲者矣獨於交隣之際未立此法而
多挾私貨敢行買賣以致辱命可乎且島夷之俗雖曰無知蠢蠢之中
必有識者豈可以汚辱之名加我禮義之邦而敢欺耶伏望 殿下命
下攸司依赴京朝臣之例定其禁物限其所賫令其道監司嚴加考察
搜檢物件如有冒濫者隨即啓聞按律科罪俾全使節命下禮曹○金
滿求鍮鑿鍮盤鍮湯灌各一磁器大小并一百二十磁酒器六油厚紙
數十張絲布一匹命與之○癸丑視事 上請左右曰大平館改造之
事何以處之已毀未造之時使臣若來則奈何右議政益思誠曰今大
平館之基西高東下地且陝隘移於興天寺若何 上曰興天寺 太
祖願刹也 太祖謂 太宗曰毋毀佛殿是不可毀也 太宗嘗曰使
臣館不可不置於昌德景福兩宮之間營於興福寺之基若何禮曹判
書申商曰興福寺基趾廣闊地勢平正必造則功省矣但恨在市井之
中也 上曰若宜營館則移市可矣或曰仍本館舊基而改令高大可

也設使臣至姑以權宜待於興天寺亦可也命戶曹判書安純與政府
六曹議之僉曰仍舊基改創爲便從之○御經筵輪對○忠清道監司
報各官鄉吏或自求或因鄉吏數少以外孫定役或以他官鄉里因所
居定役率非久遠正朝而後出者頗多今者多方托故窺免吏役紛紜
申訴若從所告盡免其役則鄉吏日減各官凋殘請以壬申年開國以
來登科雜科及三丁一子依例免役外或連三代或連二代立役者及
雖已身立役而自願求屬者勿許免役以實州郡命下政府諸曹同議
判書李孟昉等曰可左議政黃喜以爲雖已身立役而壬申年前始役
者勿許免役從喜等議○甲寅 御便殿與宗親打毬○乙卯視事○
左司諫柳孟聞等上疏曰三年之喪天下之通喪爲人子者固所自盡
也今崔自達於戊申春幸中都試五月丁父得霏之喪至十月兵曹差
授副司正自達遽自脫喪任然隨領臣等以爲百日免喪本謂軍士之
名載兵籍者也自達初以閑良試才本非軍士則當告丁憂之故以終
喪制不此之願頑忍無恥自除其服以媒仕進其忘親慕祿之心詎可
勝言傳曰事親孝故忠可移於君又曰求忠臣於孝子之門然則自達
短喪之罪非特不孝實有累於風教也且今當上國賜祭之時得霏之

子皆服衰經而自達獨為吉服尤為不可伏望 殿下亟收此職命攸
 司按律科罪俾終喪制以厚人倫以礪士風不允○兀良哈指揮白安
 土千戶也郎哈黃家老於巾加茂弓郎巨等來獻土物賜衣笠靴回賜
 繇布三十二匹○金滿求鑰器大小并二十五黑鹿皮衣一紅厚紙三
 十張命與之○丙辰移御于上林園以重修思政殿慶會樓也○丁巳
 御經筵輪對○禮曹啓兀良哈金何山願留侍朝請給鞍馬衣笠靴從
 之○戊午親傳春享大祭香祝○御經筵○金滿求火藥命給一斤○
 己未御幄次視事 上謂大臣等曰盜賊多夜行令巡綽官遍行旁蹊
 曲徑何如左議政黃喜曰巡官豈能周行曲徑兵曹判書崔閔德曰臣
 自少熟於巡綽實難周行喜復曰向因火災置警守所而人不夜行城
 內晏然復立警守所似可且行幸宿所勿令軍士巡綽但嚴坐更可也
 上曰然知申事鄭欽之啓武舉之制自宋以來皆倣文科 上曰武舉
 試取 祖宗成憲不可輕改但加所講經書可也欽之又啓有蔭子弟
 二十五已前皆入成均二十五以後方許從仕 上曰然但二十五以
 前中文科者不可不用也禮曹判書申商啓開國以來祀典所載祀祥
 之處今皆復立則其數過多故移文各道訪其靈異之所則無一不靈

異雖非降香祝致祭其邑守令亦皆致祭或以國庫或以位田或以官中供其祭具其例不一乞皆以國庫米穀供之何如 上曰祀典公革未知可公可革之由然既皆致祭則雖不降香祝亦非不祭也凡其致祭處皆以國庫供之可也○御經筵○遣內史韓龍鳳贈別膳于使臣○千秋使李恪回自京師○司諫院上疏曰無疾不忠不敬之罪固不容於天地之間王法所必誅故 太宗斷以大義置之於法以正邦刑其子誓之不可用明矣今以女誓李緊持授右軍副司正俾參朝班實爲未便伏望命收此職不復叙用不允曰緊曾棄妻子命完聚緊之告身其速暑經獻納李賴啓曰罪人之誓復叙用未便 上曰女從人者也誓不可比於親子其速暑出○金滿求白細絛紬二匹紅雌牛皮青斜皮命與之○刑曹啓乃而浦千戶曹顏仲濫增法外鹽軍九人每月收鹽人二石令船軍賫魚物換米穀又除船軍二人役各徵清蜜四器律該杖一百充軍命只杖八十其納蜜者自願與否更鞠以聞○庚申御經筵講大禹謨至俾予從欲以治四方風動惟乃之休曰此篇拳拳以刑罰之當謹爲言刑罰雖非美事亦聖人所不能已也檢討官金墩對曰刑罰雖不可無亦不可濫用故此篇屢言之也○左獻納李賴啓

前日命署李緊告身臣等更思之罪人之後不可以女壻而輕議之也
緊之娶妻若在無疾得罪之前則以女從人勿論可也在無疾被罪
之後則是知其有罪而娶之也無疾被罪之後子壻叙用自緊而始是
臣等所缺望也 上曰若等之言是矣然緊嘗棄妻子命完聚若從爾
言是予欺緊也○禮曹啓乃而浦留住倭三十七戶失火家財米穀盡
爲所燒請擇絕糧者量給還上從之○以李漬爲海州牧使漬每爲守
令不畏物議恣行已志濫費官物唯事飲酒贈遺權貴無所不爲○辛
酉御經筵○壬戌慶源兵馬使李澄玉上箋謝恩曰聖君施惠曲加矜
憐父子承恩曷勝感激揆分踰望圖報矢心伏念臣猥以謫才幸逢盛
際蒞官未効而秩彌峻從事無能而祿愈多緣遇非常眷憐尤厚而臣
父全生優游仁壽之域涵泳聖化之中五畝山田可以免飢乏一閒茅
屋足以送光陰諒臣國爾忘家謂臣忠焉移孝尚回睿鑑灼見危悰既
賜臣以府庫之藏又賜父以倉庾之積非特盡菽水之奉抑亦爲桑梓
之榮庶盡職分之當爲益固封疆之所守茲蓋伏遇以河海之量而矢
其德以父母之愛而察其情肆於不意之間霽此無前之澤眇然父子懼慶
難言大哉乾坤報酬無所謹當惟是赤心之不二至於白骨以難忘生

不憚其捐軀死猶圖其結草○遣知申事鄭欽之邀使臣設溫斟宴于勤政殿贈鞍馬及細麻布十匹宴罷 上與使臣御慶會樓觀放火炮

使臣歎賞○金滿求夫服馬粧狝皮合包草笠刀各一柳青鹿皮

五張油厚紙數十張鞍鐙銀三兩命與之○癸亥視事 上謂大臣曰

千秋使李恪言聞 皇帝欲請兵朝鮮征韃靼此語果然則何以處之

判府事許稠對曰元朝亦嘗請兵右議政致仕柳寬親見其事 上曰

不得已而應之則宜抄可用兵以送然我國山川險阻人物鮮少當奏

朝廷不免然後應之今來使臣稱 聖旨求玉燈狗兒狗兒之求似實

而玉燈則似不實以使臣賫獻玉燈奏本付于謝恩入朝崔得霏之蒼

若何宜將此意諷于使臣稠曰若是則可知其真偽也 上曰今使臣

非為本國來而其求請甚多若為本國奉使而來尤甚於昌盛矣稠曰

李恪言中朝把齊化門者求賂於本國使臣恪等不獲已許笠帽乃入

上曰金滿亦到遼東求衣服而來禮曹判書申商曰非獨內官禮部官

吏亦公然受賂古人云賄賂公行正謂此也○趙慎言子默擊鼓上言

欲赴試 上曰趙璞以一等功臣削功臣籍默乃罪人之孫不可赴試

○御經筵○金滿求紅紫染細紬各二匹命與之○戶曹啟忠清直延

豐縣人等上言本縣原係忠州任內長延長豐兩所之地去癸酉年始置監務然四環大山地又墾薄人戶僅一百八十田四百五十結又在南北驛集之處本朝使客及倭客甚繁加以炒鐵造船徭役難支逃散殆盡請以犬牙相入槐山郡東面毛香里甲吞長嶺乃火石院代城山內栗谷沙介平吾田角乎覺淵洞忠州東面官洞温井吾山嶽洞原通彌內及忠州任內甘勿內彌安富驛等地割屬本縣使得阜盛不失官號命下本道分辨以聞本道啓槐山東面角乎覺淵吾田及安富驛等地距槐山甚遠宜割屬延豐乃火石院代城山內栗谷沙介平甲吞長嶺毛香里等地距延豐甚遠仍屬本郡爲便甘勿內彌等地兩邑相距雖同而與延豐縣大山相隔仍屬本州爲便官洞温井吾山等地距本州不遠不宜割屬延豐嶽洞原通彌內等地雖與延豐遐隔然延豐東面地窄民少宜并割屬延豐從之○甲子移御于東宮東宮移居上林園○遣內史金淳贈別膳于使臣○乙丑御資善堂視事判府事許稠啓昨日漢城試因雨雪未就上曰試官請停故從之稠曰科試之法非一日然東堂禁令稍嚴監試稍寬昨日搜挾甚嚴舉子皆苦之生負非試取即用之人將使居館讀書者也不可若是其嚴也上曰予意亦

然命右代言許誠曰判府事之言然矣其語于下判府事季良亦曰
上教甚當宜令禮曹依舊搜挾勿使太嚴○大司憲曹致啓僧以仁揚
言掌令趙克寬之事義當闔司避嫌請移他司効之 上曰僧之所說
唯趙克寬事耳餘何與焉若都官刑曹等決事官因一人避嫌合司皆
避則寧有紀極但令掌令避之○幸東郊觀放鷹○金滿求火藥鐵銅
兒鎗鐵三十斤黑真草三斤命與之但鎗鐵給十五斤真草二斤○丙
寅御經筵輪對○丁卯視事禮曹判書申商啓今生負漢城試就南部
學堂開場有七十餘生排門突出試官告本曹請勿赴試 上曰何以
自出商曰其日雨雪場中窄故忿怒而出也懲其首唱者何如 上曰
士君子無禮如此勿令赴試可也兵曹判書崔閔德啓今兵器皆不實
聞金山韃靼流離失所後來之患未可知請令修治兵器 上曰卿等
擬議以聞閔德曰近來防牌攝六十並赴營繕休息無期今思政殿廢
會樓大平館之役一時並舉民力甚困姑停大平館之役 上曰予已
知之閔德出 上謂代言等曰比來未穀雖登民未蘇復宜除防牌六
十專募僧徒以造大平館雖未及霪雨前至冬而畢可也思政殿狹隘
慶會樓傾危故不得已而改之○御經筵輪對○留後司人李天生及

加勿告姜義姜吾乙未姜乙生葉鳳生童金光等鑄錢鑄器刑曹鞠之
義等四人皆實金光不實刑曹以爲誣告杖天生加勿各一百身充水
軍 上曰既不加賞又從而罪之誰敢告捕刑曹不啓而決罪非也命
憲府劾問刑曹○安平大君瑤娶左副代言鄭淵之女○使臣賜祭少
卿崔得霏其祭文曰維宣德三年歲次戊申十月己卯朔十四日壬寅
皇帝遣尚寶監少卿金滿諭祭于鴻臚寺少卿崔得霏爾以咸里之榮
克恭而慎所期永遠遠聞計音親親之故良用悼歎特茲遣祭爾其享
之○兀狄哈豆稱介等辭賜豆稱介鞍馬衣笠靴及染紬絲布各五匹
○吏曹啓茶房左右番叅外別監等請依架閣庫三軍錄事內侍例加
給權務八品迺兒職命與政府諸曹同議僉曰宜減內侍八品迺兒一
三軍錄事權務迺兒二以給從之○吏曹啓咸興平壤土官與朝官職
品相准未便請以土官五品准朝官六品以此遞降其位次各從從品
之未從之○命蠲咸吉道北青住各司奴婢去年身貢以有水災也○
戶曹啓京畿水原府去甲辰年漕運之穀船敗沒溺今又遭風滄沒死
者六人請自今京畿水路漕轉各官並令陸輸從之○戊辰御經筵講
禹貢至鳥鼠同穴曰漢人嘗語予曰鷺生狗鳥鼠同穴未知是否夫

子不語怪力亂神先儒論恠誕不經謂此也○輪對○左司諫柳孟聞
等上疏曰謹按六典土官除授之法以寅申巳亥爲式年蓋欲以其任
而專其務也近年以來咸興平壤府其土官除授不依限年之法並稱
不堪其任無時改除故一年之內累遷資級或以九品陞爲七品八品
陞爲六品既乖除授之法又以非土著者濫差土職以爲仕進之階臣
等以爲土官之職雖卑豈可以一己之好惡任情差除乎臣等願土官
除授一依成法每當式年差下其托故改除一皆禁斷儻有窠闕薦土
人有材幹者并錄其居處與父之姓名然後銓曹更加覈實如有濫薦
者移文憲司按律科罪則庶無屢更冒進之弊矣且土官之職不可與
朝官比擬今以土官准京職差除實爲未便伏望 殿下俯察瞽言申
明土官除授之法以杜冒濫又下土官降級之命以尊朝官命下吏曹
本曹啓土官降級之事已曾移文其除授之法乞依諫院所啓從之○
命知申事鄭欽之贈石燈盞二事大狗十隻于使臣使臣擇大狗五隻
受之○金滿求造帳紅厚紙四十八張頭目鄭伯謙求絲布一匹命與
之○已巳御經筵輪對○幸東郊觀放鷹○庚午視事禮曹判書申商
啓自立科場搜挾之法中外學者皆誦經書正文及抄集其後不禁挾

冊近日漢城試雖有搜檢之官或搜或否實爲不均搜檢之法已載元
典乞依成憲勿更其法如是則人將勤學而皆誦經書矣 上曰予未
知載在元典又有言者故今勿禁若載元典則何必改乎更議以啓
上謂左議政黃喜曰使臣初言前者來時只與馬二匹今也與三乎與
二乎言之甚勤喜對曰 太宗朝黃儼來或與一匹或與二匹鮮有及
三匹者且於幕華樓餞宴與之則有矣 上曰如此使臣給二匹亦過
矣彼雖勤說已有成例餞宴勿與亦可也 上又曰石燈盞使臣欲自
賚進故予曰將錄于奏本使臣曰吾欲自進則是乃自求也雖怒其數
少既荅以難得不可加給也 命知申事鄭欽之問安于使臣仍贈大
狗十隻 御經筵輪對 左司諫柳孟聞等上疏曰臣等伏覩除目以
待教崔允中降爲檢閱以奉常錄事吳慎之代爲待教有違資格移文
吏曹問之則荅云從藝文館薦望差除臣等竊謂除授之法不可不重
有過而左遷則宜矣無過而降級古所未聞今允中本無過失乃降本
級實爲未便慎之雖有薦望待闕充差可也伏望命下銓曹俾正差除
○開城留後司啓安和寺僧信勝擅燒死僧埋之以干邦憲請罪之不
允 辛未傳旨工曹自今宮闕外公私屋宇勿用朱漆 禮曹啓日本

通信使從水路累月往還遲速難期請自今使以下私賫布物許於赴
京之行倍數賫去金銀銅錢花席虎豹皮等物一皆禁斷監司教差使
負憲府亦遣吏搜檢從之○禮曹啓文科殿試儀試前一日繕工監設
題板于殿庭東西其日鷄鳴赴試生會于闕門外贊明鼓三嚴侍臣先
就殿庭東西分立次引赴試生俱入庭北向立中禁傳嚴爐烟升殿下
出升座侍臣橫行行四拜禮還位次奉禮郎引讀卷官入就位重行北
向立通贊贊鞠躬四拜興平身讀卷官及赴試生皆鞠躬四拜興平身
次引讀卷官由東階升殿就座先是有司設讀卷官二品以上座於東
廡三品以下座於南行近東又設赴試生座於東西廊次代言傳宣通
禮門稱有旨赴試生皆俯伏通禮門以試題付于板上赴試生與殿
下入內侍臣出赴試生進寫題各就座日未昏皆進卷子而出武科殿
試儀先期有司於試場除地為壇設大次於壇上南向又於其南張步
射之候三遠候二百四十步中候一設騎射之的左右各三
的共五十步左射右射
者射左右射者射右
立騎槍之標三
左右互對標間相
去准騎射之的
車駕動侍衛導
從如常儀至大次前下馬入次即座兵曹訓練觀及赴試人入大次前
重行北向行四拜禮訖二品以上由西階升就壇上座三品以下各供

事赴試人皆退持弓矢以俟兩人為耦就射位射遠候人發三矢衆耦以次射訖退中候小候皆如上儀騎射驟馬射的人發三矢訖退騎槍

驟馬作勢每標皆變勢過三標又變勢以退擊毬驟馬備勢行杖出毬

門訖皆退車駕還宮侍衛導從如常儀文武科放榜儀先期設鳴榜位

於殿階上左右近南相向文科在左武科在右設左右侍臣位於殿庭東西如常

儀內臣在侍臣之後設諸生位於殿庭文東武西中心為頭每等異位重行俱

北向鼓初嚴繳扇仗衛入陳如常儀鼓二嚴代言及上大護軍護軍入

庭行四拜禮侍衛如常儀次內侍茶房參上參外入庭行四拜禮東西

分立次行首牽龍入庭行四拜禮分立已上並時服唯執卷內侍公服次奉禮郎引侍

臣入庭三館及訓鍊觀參外隨至並朝服橫行行四拜禮東西分立三館在左侍臣之後

後臣之鼓三嚴中禁傳嚴爐烟升殿下出升座通禮門唱榜負內侍執

卷負揖出位由東西階各就位唱諸生名先文後武相間唱諸生公服

入就位奉禮二人在左右指揮以次唱畢通贊贊鞠躬四拜興平身諸生鞠躬四

拜興平身通贊贊跪諸生皆跪分賜紅牌文科吏曹主之武科兵曹主之次賜酒果及

花酒果茶房主之次賜蓋一等司通贊贊俛伏興四拜興平身諸生俛

伏興四拜興平身次唱榜負以下下殿橫行行四拜訖各復位次侍臣

以下橫行行四拜訖 殿下降座入內諸生以次出奉禮郎引侍臣出
從之○金滿求兩傘黃蜜縣子水獺皮人參雀舌茶酥油燒酒柘子酒
命與之○壬申視事御經筵輪對○辛東郊觀放鷹○命禮曹佐郎閔
厚生致祭于左代言金緒教曰脩短之期雖關於理數君臣之義無間
於幽明求懷弼亮之賢庸示褒崇之禮惟爾性資明敏器量宏深識達
施爲名已優於仕版學道今古藝再捷於文場肆予蒞政之初擢置近
臣之列每當經筵之講讀發揮聖學之淵微真文苑之英而縉紳之秀
者也爰作喉舌以代予言讜論合於時宜謀猷切於啓沃出納惟允裨
益良多予心曰嘉眷遇即篤謂將永世長補眇躬云胡告病之未幾忽
聞訃音之斯至興言及此曷勝盡傷茲命禮官往奠一爵於戲良臣已
逝悲一鑑之忽亡恤典斯舉慰九原之不昧○吏曹啓開城留後司館
判官及醫學生徒元有職者請隨品用於京外官無職者則以 齊陵
厚陵直爲迺兒命下政府諸曹同議僉曰判官則改稱館別差定額二
十擇解文字者定之給 穆清殿直一爲迺兒元有職者以行職差下
若醫學生徒則其成才者將由醫科出身勿給迺兒爲便 從之○金滿
求馬粧羨藜砲大小發火火藥等物命與之○司憲府啓敦寧府錄事

黃義軒以執事詣 獻陵行祭托疾不侍衛還香潛率倡女宿於盧處
中家彈琴唱歌徹夜宴飲請杖八十從之○許稠啓自古昇平日久則
備禦懈弛以致不虞之患慶尚道沿海各官倭寇朝夕往還而城堡不
完不可不慮臣願不限歲月每當農隙築之期以十年則城堡完固矣
上然之即命右副代言鄭淵曰許稠之言防微慮遠之計也慶尚公
海各官築城之事其告于兩議政○癸酉視事御經筵輪對○甲戌視
事御經筵輪對○命知申事鄭欽之贈使臣毛衣冠及衣一襲靴套等
麻布各十匹人參十五斤滿花方席四張滿花寢席二張石燈盞一事
頭目十八人各衣靴及麻布二匹使臣進段子羅紗白細毛子大絹各
一匹錦護膝錦囊青畫白磁鐘白磁畫鐘玄雲油烟墨紅象毛馬飾畫
鑰簫畫鑰鞘柄畫鑰雙刀子銀筋具象牙鞘柄三刀子雙刀子猪羊各
一口回贈麻布二十九匹苧布九匹進 中宮段子羅紗大絹各一匹
縣臙脂五百粉櫝二針五百象牙鞘柄三刀子回贈麻布十匹苧布五
匹進世子宮段子羅紗絹各一匹紅象毛馬飾油烟墨青玉柄刀子
嵌金尖子具象牙鞘柄三刀子回贈麻布十匹苧布八匹進徽嬪宮段
子綾白綾絹各一匹粉櫝二絲燕脂五百針五百象牙鞘柄三刀子回

贈麻布十匹苧布四匹贈晉平大君琛安平大君瑤臨瀛大君璆各段
子五匹回贈各麻布十五匹苧布五匹○刑曹判書金自知辭職曰臣
以庸材過蒙 聖恩位至判書動輒錯誤宜坐重譴既令免罪復命就
任然臣以刑曹長官昏昧事理再觸邦憲不合盛世設官分職之意請
收臣職代以他人不允○遣宣慰使判敦寧府事韓長壽于留後司都
揔制元閔生于平壤揔制趙慕于義州○乙亥 上詣大平館行茶禮
患微瘧命世子行餞宴使臣曰 殿下事朝廷至誠故待我極厚心實
感謝問 王世子習射乎元閔生荅曰今方讀書使臣曰以讀書爲事
固善矣○丙子御經筵輪對○傳旨濟州安撫使曰今送醫書十七件
其教誨醫生以救疾病○二月丁丑朔 上率世子及百官餞使臣于
莫華樓命都揔制元閔生知申事鄭欽之慰送于碧蹄驛以府尹權蹈
爲伴送使閔生欽之啓使臣行至中路忽單騎馳還曰願更見華慕樓
至礪石嶺問曰吾所戲之妓安在從者曰先往留後司以待使臣乃還
○戊寅視事輪對經筵○兵曹啓前此各道人願屬捉虎甲士者本曹
不問才否許令入屬實爲未便自今本道兵馬都節制使當虎豹興行
時令自願人捕捉依會降教旨分其槍箭先後口數多少報于本曹本

曹隨即馳報以所獲多者隨闕填差從之○己卯視事經筵○以鄭氏
爲三韓國大夫人馬天牧長興府院君成抑左軍摠制李明德仁順府
尹沈道源漢城府尹柳季問刑曹參判洪汝方左軍摠制趙慕李澄石
右軍同知摠制黃鉉仁壽府尹行成均大司成許誠左代言鄭淵右代
言李師厚左副代言李孟珍右副代言皇甫仁同副代言朴瑞生右軍
僉摠制柳孟問左司諫鄭氏安平大君瑬之妻也○吏曹啓宗學教授
官請於從三品從四品從五品從六品各設一位其班次則三品奉常
寺尹之下四品宗簿少尹之下五品宗簿判官之下六品集賢殿副修
撰之下以職品相當者二人差下從之○命還給宦者俞實尹吉職牒
○命放付處前大司憲趙啓生前掌令趙瑞康○禮曹據禪宗呈啓興
天寺本是 太祖所創願刹朝廷及隣國使客亦皆遊觀今舍利塔殿
表刹傾危鐘樓亦兩漏朽破欲令緣化修葺其化主及助役僧或賞職
或給度牒以勸從之○庚辰御經筵○以兵曹判書崔閔德爲忠清全
慶尚道都巡撫使○辛巳視事贊成權軫啓講武時各道監司欲進
方物購求狼尾飾夫服一尾直繇布六十匹其弊不少請除之 上曰
然即傳旨各道監司自今狼尾若韋捕獲則進之勿貿易○上謂代言

等曰興天寺舍利殿 太祖所創也今聞傾危欲募僧給度牒修之石
手木工則繕工監監役官則造成都監主之可也○御經筵輪對○命
蠲咸吉道各官今春採金之役以去年有虫水之災也○吏曹啓今以
平安道延山撫山合為寧邊大都護府其翼屬各官悉宜更定前此
順安縣屬平壤道右翼寧邊府屬朔州道中翼博川郡屬朔州道左翼順
川郡屬安州道右翼肅川府永柔縣慈山郡屬安州道中翼江東縣屬
平壤道左翼价川德川二郡屬安州道右翼今改平壤道中翼平壤府
左翼中和祥原三登順安右翼江西龍崗三和咸從甌山安州道中翼
寧邊府博川安州順川左翼殷山成川陽德孟山右翼肅川永柔慈山
江東義州道中翼義州定寧麟山龍川鐵山左翼宣川郭山隨川右翼
定州嘉山朔州道中翼朔州泰川左翼雲山价川右翼昌城碧潼江界
道中翼江界府間延左翼熙川德川右翼理山 命依所啓○咸吉道
監司啓童巾愁州等處住兀良哈指揮伊麼疎古老都乙昏都乙温等
使人來告我等所居童沙吾里之地乃兀狄哈成群出來之路因此屢
失馬匹未得安住去十二月十七日我等所居里及阿赤郎耳等處七
十餘戶悉以妻子財產移置童巾愁州等處本月二十五日我等十人

欲取遺教還向童沙吾里路逢巧乙未車兀狄哈三人射獲之問其來由
答云聞愁州住兀良哈大也乃多畜財產馬匹欲偷而來我等所移愁
州等處將不得安住願移居古慶源阿多老訓春等處節制使答云阿
多老訓春等地係是朝鮮近境汝等其勿來住○司憲府啓大小人負
或未知各年受教犯法者頗多請略節禁令條畫爲文板掛光化門外
及都城各門鍾樓等處令其悉知一婚姻之家於迎婿之夕設盛饌先
饋婿之從者第三日盛設油蜜果幾至方丈以燕督婦將其餽餘送于
舅姑之家又迎婿真日賀客填咽燕樂一皆禁止一婚姻時本非帶銀
者隨其時散用角帶條兒炬火二品以上家十柄三品以下六柄女家
同違者禁止一大小婦女從婢之服不許襪裙笠帽則只用苧布不許
羅絹其帽襜長短不與主婦齊等主婦帽襜長一尺則從婢長半尺違
者禁止一新婦初謁舅姑之日饌品五星二部餅二棹三味湯物合計
七盤乳母一人侍婢二人奴子不過十人違者禁止一凡婦女服父母
舅姑與夫之喪自宗室至士庶人不許百日釋服終三年喪笠帽與服
皆以生麤布爲之男子服斬衰者毋得騎馬入于朝路違者禁止一期
親之喪雖於三十日釋服未經百日婚姻者禁止一大小臣民 宗廟

前路及闕門前路騎馬過行者禁止一大小人負闕內胡跪禁止一各司朝會禮畢後拂衣禁止一時散大小人負灰色衣服禁止一大小人負及工商人起子靴禁止一上下衣服升數無等苧麻布絛紬木絛交綺一品至兩班子弟用十二升以下工商賤肆八升以下貂裘兩班子弟外工商賤隸不許服用違者禁止一中外金銀寫經塗佛禁止一大小男女黃色衣服禁止一大小人負朱紅黃丹肉色鞵禁止一各品金銀帶飾紅色皮禁止一進上衣櫛及闕內所用外紫色衣服自庚戌年始禁一庶人及工商賤隸斜皮靴鞋絹子衣服禁止一婦女上寺禁止一僧人出入寡婦家禁止一五六品雙穗兒叅外有穗兒鞵轡禁止一兩班婦女卷帽檐禁止一土紅玉色衣服使臣迎接及大小朝會不許穿著違者禁止一大小人負路祭設佛排禁止一事佛薦亡大夫士庶人皆就山水淨處只設水陸齋其供辦除俗人皆令僧人主之守殯喪主外子孫一二人往與此外雜人雖設齋翌日不許叅與違者禁止一大夫士庶人之喪設法席禁止一金銀非本國所產進上服用器皿闕內酒器朝廷使臣支應器皿朝官品帶命婦首飾士大夫子弟耳環女妓首飾外器皿及銷泥金銀禁止一進上服御外朱紅著漆及紫斜皮禁

止一鑄鐵器四私相買賣禁止一六君以下東西各品朝路率行丘史
公私人勿論大君十名正一品九名從一品八名正二品七名從二品
六名正三品內通政五通訓四從三品至四品三名五六品至九品二
名兩班無職子弟一名兩雪則私丘史加二名二品以上老病轎子擔
持時私丘史加六名五六品臺諫院加一名違者禁止一大選入格外
無度牒僧人所在官司依律論罪還俗當差借者與者並依律論罪一
宰殺牛馬曾有禁令大小人負母得食其肉其自死之肉京中漢城府
烙印外方受官文後方許賣買違者禁止一進上外無牌鷹子飛放者
禁止一承傳急事外走馬城內禁止一大小人負奔競執政家門禁止
一花席進獻及國用外一皆禁止一拜表時各品從馬隨品分置闕門
外東西以次出來騎馬行違者禁止一有職事人負白色衣禁止一城
內動樂神祀禁止一常人城內騎馬禁止一工商賤隸真水精珊瑚纓
子雲月兒禁止一僧人黑細麻布衣禁止一常人套鞋禁止一從之初
上初見禁令條畫曰如有父子兄弟族親往來遠地則不可無迎餞獻
壽父母則不可無宴飲其他不切迎餞宴飲則痛禁可矣不宜一切
禁之遂命刪去○壬午御經筵○吏曹啟前此城門都監以工曹參

判爲實案提調其後合城門禁火爲一都監而參判不與都監則諸處
救火事務煩劇工曹則多領諸色匠人請依兵曹漢城府義禁府例以
工曹判書爲實案提調從之○賜政府六曹堂上農書各一秩○
癸未幸東郊觀放鷹○命同副代言皇甫仁賚內醞餞長興府院君馬
天牧于禮曹仍賜樂以天牧乞骸歸田里也○崔得霖塔副司直具績
賚移禮部謝恩咨以行○甲申視事輪對經筵○禮曹據樂學報啓古
人鑄鐘之法銅錫交八斤兩有定謂之有齊不可加減我朝所鑄編鐘
只依中國賜樂編鐘鑄造銅錫斤兩未能按法交八聲不清和且音律
所以不協者蓋以中國之制歷代各異而前此賜樂編鐘內十二律名
一般刻標而聲音則各異當高而下或當下而高高下不齊我朝所奏
尤爲不協於新舊編鐘內雖擇其中律者用之一處之祭尚大半不足若
值並祭則更無所用其體厚聲高者猶可磨正用之若過薄聲下及
穿缺裂破者雖或改正未易充數請置鑄鐘所依法鑄成從之○傳旨
刑曹京外獄囚屢嬰疾病者蓋因獄內或不潔淨厲氣蒸熟因而生病
以致夭關其救恤條件累降教旨而司獄官視爲又具專不奉行今後
京中司憲府外方觀察使申明考覈俾免札瘥之患○乙酉上率王

世子及百官賀 聖節○御資善堂打球諸宗親入侍○丙戌視事禮曹判書申商啓唐人多金夫年四歲被虜於倭去己亥年到本國今歲遂上國何如 上曰 太宗時欲發還被虜唐人朴訔朴信等啓曰若發還則上國必知我國與倭交親之意不可遣也 太宗曰我國發還之意厚矣何避嫌之有皆令入送禮部果奏我國與倭相交之意 帝答云朝鮮入送之意甚厚厥後張青爲倭所虜隨我通信使朴熙中而來議欲發還上國時有沮之者而竟入送我國與倭交通上國豈不知之○右代言鄭淵啓巡撫使崔閔德今春下去則不無擾民之弊莫若移文各道先訪可築城處又訪於曾經其道監司元帥守令其言不一則待秋而往審定便否知申事鄭欽之啓崔閔德言若來秋豐稔則莫如今春豫定可築之處 上曰然宜於今春遣之○御經筵輪對○左司諫柳孟聞等上疏曰本朝之制賤者有功不可爵賞而賞以布帛者所以辨良賤謹尊卑也近以造成之功差各司奴爲隊長給事者四人移文兵曹問之則答云繕工提調不分良賤而泛稱匠人以啓故本曹不知良賤而除授由是觀之賤口之受職者非特此四人而已臣等竊念爵命國家之所重名分古今之所謹隊長雖微亦王爵也豈宜授之賤

口而亂分乎始之不禁終將莫禁在今盛朝一開其源末流之弊必至於尊卑失序良賤相混後世之患不可不慮伏望 陛下收還四人之職又令攸司考其賤口之濫受者追奪其爵自今賤口雖有大功勿許除職賞以錢帛以嚴良賤之分○盜竊內府財物命搜捕宮城內○禮曹啓所撰 太宗恭定大王 元敬王太后喪葬儀軌因倉卒頗有未盡節目今考古制錄於儀軌之末以憑後考一古制天子三日小斂七日大斂而殯諸侯三日小斂五日大斂而殯大夫士二日小斂三日大斂而殯則其斂殯日數尊者緩而卑者速自有定制不可進退也今儀軌內小斂大斂皆在第三日此特以熟時故從權而已非喪禮之常經也一文獻通考周制大喪封人飾其牛牲而朝夕奠用脯醢朔月月半祖奠大遣等奠皆用牲牢文公家禮朝夕奠設蔬果脯醢朔望則具盛饌其朝夕朔望奠饌之品自有隆殺我 太祖之喪無朝夕奠只設晝奠而饌品則油蜜果實果交排九果床三味飯物 懿靖大王之喪始設朝夕奠而饌品依 太祖書奠例 元敬王太后之喪朝夕奠初依太祖時例後加油蜜果四行床 太宗之喪亦用四行床饌品之盛幾於朔望一日之內再設別奠異於古制朝夕奠饌品當依 太祖書奠

例用油蜜果實果交排九果床三味飯物一文獻通考周諸天子諸侯
之喪斬衰者奠註云諸臣斬衰故斬衰者奠以主人悲哀不暇執事故
不親奠朔日月半別奠同文公家禮自初喪至題主奠皆祝奠酒至虞
祭主人始親奠者蓋從周制也大唐元陵儀注及宋孝慈淵聖皇帝喪
大斂奠嗣皇帝皆親奠此與周制不同也我太宗恭定大王之喪
元敬王后之喪自初喪至虞祭前朝夕奠皆依周制及家禮並以執事
者代奠朔望則緣唐宋之制 殿下親奠與周制主人悲哀不暇執事
之意異矣朔望奠當依周制執事者代奠一杜氏通典勅使策賧諸王
儀使者及副俱公服喪主以下內外具衰服文獻通考皇后謚告大廟
儀大尉就位再拜詣神位前搢笏上香奠酒執笏再拜又上謚冊寶於
靈座前儀上冊寶太傅等官常服黑帶我 元敬王后初喪上尊號時
文武百官當服衰服而與上冊寶官並服常服 太宗初喪上尊號時
上寶冊官當服常服而與百官並服衰服前後之禮一而所著之服有
失之當依古制受命上冊寶官等用常服黑角帶宗室及百官用衰服
一古制大喪有禁樂停祭巷市之節而無停朝之文我 太祖之喪停
朝十三日殿後國喪皆限十日大臣之喪限三日竊謂大臣之喪停朝

三日者所以示爲大臣行三日之喪也若大喪則舉國皆行三年之喪
而言停朝十日則十日之外似與平日無異當依古制大喪則無停朝
之令一古制襲衣天子十二稱上公九稱諸侯七稱大夫五稱士三稱
小歛衣自天子至於士皆十九稱大歛衣天子百二十稱上公九十稱
諸侯伯子男七十稱大夫五十稱士三十稱本國 恭靖大王喪襲衣
七稱小歛衣十五稱大歛衣三十八稱 元敬王后喪襲衣七稱小歛
衣十九稱大歛衣九十稱 太宗恭定大王喪襲衣七稱小歛衣十九
稱大歛衣四十稱襲歛依數當依上公例從之○司憲府啓僧以仁嘗
住龜山寺潛奸本司婢同叱加伊生三子今住開慶寺仍爲已妻以飯
僧米鹽密遺其妻又於 太祖神御前飯米雜以粟粒自住開慶以後
尚往京家恣行淫欲姦貪陰譎莫此爲甚按律進御餅食之物不潔淨
者杖八十僧道通奸者加九奸二等杖一百計監守自盜之贓則杖六
十徒一年刺字請從重科罪從之○兵曹判書崔閏德將各官城子造
築條件以啓一下三道各官城子內防禦最緊沿邊郡縣則除山城皆
築邑城其無可用邑城者仍修山城一各官築城時各以附近陸地州
縣或三四邑或五六邑量宜并定次次造築一民戶數小又無可築城

子各官則於隣官城子推移并入一各官有可用舊城則仍修之無可
用舊城則擇近處新基築之一各官有不實城子則各以戶數多少或
退或縮隨宜改築一各官城子不可一時畢築各以城子大小量宦限
年堅實造築命下工曹○丁亥打毬諸宗親入侍○捕得盜內府人內
瞻寺奴丐知介囚於義禁府鞠之所竊之物銀盂蓋兒白苧布段子紫
紬袂也初丐知介潛挾物而去思政殿造成人金春兩捕告于內官田
吉洪大護軍尹麟吉洪等不問放遣之至是義禁府請并鞠吉洪麟等
從之尋釋吉洪等○戊子御經筵輪對○兵曹啓言者以爲其人之役
人之所甚苦者也州府郡縣大小碁布其地之廣狹戶口之多寡邑之
殘盛田品之肥瘠各有不同若其地廣人多邑盛土沃而多定其人則
民何憾焉如或地狹民少邑弊土瘠而多定其人則其爲勞苦百倍於
彼豈得無憾姑舉黃海道一二州縣陳之如黃州則牧也而其人之數
三平山府也而其數一谷山郡也而其數三江陰兔山兩縣則并定一
名其定數不同如此故民之勞佚苦樂大相遠矣願核各邑其人之數
科等詳定俾之立役命令擬議戶曹判書安純議謂各官其人謀避其
役人吏之數不以悉報故取實詳定爲難宜令監司詳考各官十年以

後人吏案移牒該曹據以均定從之今據各道回報更定京畿率以五十名定其人一名慶尚全羅忠清黃海江原等道三十名定一名其少有增減者因其邑之殘盛也○己丑視事 上曰農家播種若未適中而大早則蕎麥之類結實未多然去年因晚種禾穀不實蓋以百姓昧於節氣早晚官吏亦不赴時勸課而然也寧失之於早不可緩也○御經筵輪對○新作內樓三間○遣內史金淳賜貂裘毛冠耳掩于宮院君馬天牧○賜府院君李稷等四十一人大全易書春秋各一件○左司諫柳孟聞等上疏曰臣等伏聞命兵曹判書崔閔德巡察忠清全羅慶尚公海城堡可築之處是誠 聖上安不忘危用戒不虞之深慮也然事有緩急時有先後忠清慶尚兩道近因旱乾禾穀不登民尚艱食全羅一道雖云豐稔不可謂之大熟况量田敬差官自冬徂春奔馳州郡絡繹驛路供億之費姑置不論豈不有弊於民間乎今又大臣奉命以行與監司節制使並馳州縣則非特迎送之勞弊將及民恐致妨農且今年節氣早於他年而公海耕種之候視陸地尤早伏望 殿下姑停此舉待以秋冬俾全農業○罷僉摠制楊春茂職○庚寅視事御經筵輪對○幸東郊觀放鷹○辛卯視事御經筵輪對○司憲府上疏曰

伏聞罷僉摠制楊春茂之職問春茂以罷職之由荅云正月初五日
王子避病到家翌日以洗馬歸箭串意謂避病之所宜禁雜人又不可
以酒氣馬氣相近遂歸于家宿焉 上以薄待王子罷臣之職臣謂
王子避病到家則宜其痛禁雜人不離侍側以盡臣子之職乃托以出
仕洗馬遂歸遠處恣情飲酒辭以酒氣馬氣不歸其家其厭憚之迹著
現大為無禮其曰 上以王子薄待罷職之語尤無臣子之義請收職
牒鞫問情由按律科罪從之春茂娶本宮婢自潛邸時得侍從○司憲
府啓監察許屣等告監察姜齊老曾名以石就於孟希道受學潛奸希
道妓妾見黥尋改名寶明赴溫水鄉學以私怨假造學長形像斬其首
一時學徒論以師弟之間大為不敬報于官及監司斷罪定役且其母
曹氏曾嫁私奴生子後嫁姜成吉乃生齊老其嫁私賤之事教授官朴
居善言之明甚不惟心術不正其母又嫁賤肆願斥此人以正臺綱今
齊老之事雖經赦宥有所告若實則非惟不宜監察其餘朝官亦未堪處
不然則當論誣告之罪請更推鞫以辨虛實從之○壬辰 上打絨諸
宗親入侍○持平李重啓楊春茂忌憚 王子托故橫行情甚不敬請
加拷訊不允○司憲府啓楊春茂起自土官官至僉摠制 上息至重

王子避病到家則尤宜謹慎接待乃托以洗馬出歸遠處爭射游戲飲酒相樂退宿妾家蹤情逞欲又往見黃疽人以所乘馬送于避病之所病中所忌無所不爲不但厭黷窺避略無敬上之意請依律科罪命於所居官充軍○左司諫柳孟聞等上疏曰謹按六典三年之喪天下之通喪也親父母服許從其制其中關係國家要務必合起復者奪情起復蓋起復一時之權宜非萬世之常經然人臣有才兼將相身佩安危被堅執銳折衝禦侮者則起復之權誠有不得已也今成抑丁母喪方在喪經之中 陛下命除摠制俾參朝列臣等竊謂帝王敦化之源莫先於孝人子事親之孝莫重於喪故喪有三年之慘乃子職之當然昔在宋朝史嵩之起復招太學之群譏韓魏公謂起復非朝廷之好事今抑之脫喪復職非以禦侮非以治事也無因復職以開短喪之漸非特有乖於成憲實有累於風教伏望 陛下收還起復之命俾終喪經之制以敦孝治不允仍曰若等之言是矣然亦有是法焉左獻納李穎啓今抑非折衝禦侮之才非關係安危之臣請收起復之命以終其制上曰本人雖非折衝禦侮之才起復之法古亦有焉況今業已起復不宜還收自今當悉從若等之請○義禁府啓于知可盜內府銀器及

雜物律該斬不待時從之○講武時禁令條件一每日宿所晝停除都
差使貪令其官守令考察一司僕寺馬匹養飼勿論郊穀草供進一尚
衣院司僕司饗忠扈衛等所用雜物翌日悉還物主其所掌下人雖有
稽緩之事勿令擅便歐打告于承政院一侍衛大小軍士馬草賜以近
處所積郊草勿於民間收用一衿軍牽馬陪鞋襪等物勿令備給一進
上物色及司膳司饗依式供進外別用物色及酒米須考承政院帖字
供進一不得已水深處量設橋梁其餘道路勿令修治一其道監司首
領官及所過境內守令外各官守令毋得越境一隨駕各驛馬從發京
三日後依前例給料一京畿咸吉江原黃海道進上則行在所他道進
上則時坐所進之一上項事件外監司守令收斂民間隱密贈遺者察
訪巡行捕獲報兵曹依已會受教計贓論罪一駕前察訪先到宿所米
豆及不得已供進外汎濫事件悉令考察○癸巳視事御經筵○持平
李重啓楊春茂之罪大矣而命還本邑但供軍役何所懲戒請依律施
行以懲不恪 上曰充軍足矣不必加罪○甲午幸東郊觀放鷹○前
都摠制曹洽卒輟朝三日致奠及賻○兵曹啓隨駕各品散料式大君
從人十二大馬五小馬七伴人四從人各一大小馬各一正一品從人

十大馬四小馬五伴人三從人各一大小馬各一從一品從人九大馬
三小馬五伴人二從人各一大小馬各一正從二品從人八大馬三小
馬四伴人二從人各一大小馬各一僉摠制以上從人七大馬二小馬
三伴人一從人各一大小馬各一判事以下從人五大馬一小馬三四
品從人三大馬一小馬二五六品從人二大馬一小馬二七品以下至
自身從人二大小馬各一吏典使令自肆下典當身正官一時白米一
升伴人以下中米一升大馬一日大豆一斗小馬一日大豆五升從之
○乙未視事 上謂大司憲曹致右司諫申包翹曰卿等各進封章請
抵春茂罪固爲當矣然春茂本病人也今若加罪則雖減等必至杖一
百病而受杖則或至於死以摠制而罷職充軍足矣茲不允卿等請
○御經筵輪對○左司諫柳孟聞等上疏曰楊春茂起自微賤別無才
德過蒙 聖恩位至僉摠制寵榮已極圖報末由今者 王子避病于
其家爲春茂計者小心謹慎不離左右惟勤支持之不暇反生厭心托
以洗馬出而不返射御飲酒遊戲無極又以馬氣酒氣爲辭避宿妾
家縱欲無忌其不忠不敬之心孰甚於此 殿下特從寬典只奪其職充
軍本土是則罪重而罰輕臣等深有憾焉伏望 殿下更令攸司按律

科斷明正其罪以懲不恪不允○戶曹啓曾下傳旨令磨勘成吉道採
金慶尚道銅鐵炒鍊等事以聞成吉道各官員金則每年春秋定數採
取若船軍採金則無定數亦無日限故自甲辰至戊申年所採之數多
則十七兩少則七八兩役人或四十日或二十日皆無定法請自今酌
定船軍及役日斤兩之數採取以進其慶尚道銅鐵炒鍊則令所產昌
原咸安固城靈山義城密陽金海仁同等官當農隙採取以試所產多
少炒鍊難易從之○丙申月犯心大星○考試官禮曹判書申商等取
生貧庾智等百人○丁酉 王女卒命禮曹議喪葬之禮王女官人出
也○召左獻納李賴曰前者疏請諸色匠人勿許賞職其辨貴賤之等
可謂當理然匠人受職非始於今不可遽廢姑署告身○戊戌司憲府
啓內禁衛副司正李仲林奔競于兵曹判書崔閏德家律該杖一百罷
職發邊遠充軍命杖八十充軍○己亥視事 上謂右副代言李孟珍
曰宦者朴安中本沃川吏也 太宗時稍蒙恩願予在潛邸令其將命
乃與近使婢私戲恣行不義故 太宗命還本役近問到京其來已非
矣又乘昏見于駕前罪亦不小可令刑曹執之還其本役○上曰全羅
道敬差官李沾量田不中其下憲府鞠之○輪對○慶尚道監司進新

刊易書春秋板子命下鑄字所○庚子傳旨講武還宮勿進豐呈○
辛丑遣工曹叅判李歲巡審平安道城基○親傳講武告宗廟祭香
祝○賜祭于卒都摠制曹洽教曰臣以忠而事君既能委質上以禮
而接下思篤報功卿內守堅貞外行謹勅是用皇考擢拔寡人褒嘉
名重當時位躋宰列入則為干城禦侮之任出焉有奔走宣力之勞
頗有功于我家而不忘乎予念計音忽至盡傷良深茲遣禮官致奠
惟側於戲氣固有其聚散雖死生之殊途恩無間於幽明庶哀榮之
盡禮○大司憲曹致等上疏曰酒之用一也飲之有度則受福飲之
無度則受禍故先王作酒誥告教諸侯至于治事之臣謹戒于酒惟
用之大祀而已非資其沉酗也 殿下欽恤小民飲小而輒受罪責
止令禁其會飲迎餞無識之徒不體 聖上欽恤之意或會族親或
因神祀群小男女秘密相飲其酒饌之脩倍於宴飲既醉之後爭相
鬪詰或至傷人非特群小至于士大夫治事之臣亦皆崇飲請自三
月十日為始大小祭享各殿供上朝廷使臣隣國客人慰宴外中外
公私用酒一皆禁斷以除忘費以成禮俗臣等又慮農事之本在於
不失其時不失其時在於守令今東作方興為守令者或因不緊之

務以防農事姦猾之徒亦欲連訟京外官吏處決後隨即呈誤決于本府拘於限日見身之令不願家產立待官門以廢農業其將可慮乞自三月初一日為始八月晦日為限中外訴訟內奸盜及人命所係見捕逃奴婢外一皆停罷專務農事令其諸道監司早穀則自三月初一日為始至十五日中穀則自三月十六日為始至晦日晚穀則自四月初一日為始至十五日定為期限督令畢種其耘田之法刈穫之期亦令監司問其穀之早晚隨宜定限毋致愆期以厚民生上曰酒禁則糾察不詳往往貧窮者偶飲濁醪見執豪富者日飲無敢誰何不均甚矣勿禁可也播種則以節氣為之早晚未可定限也但移文各道使之勸課可也務停則近日各道監司已啟停之外方誰有告爭者若居京者則固無耕作之事也○判府事許稠啟今盛代孰有奔競而得職者近日軍器判事韓穩因關白公事往兵曹判書崔閔德家以奔競罷職請赦之命勿罷職○禮曹判書申商啟近因使臣支持之煩每遇名目未進豐呈况講武還宮之日進豐呈已有前例今命停之恐此禮遂廢矣上曰還宮日若不雨則當從卿言○禮曹啟前此文科館試漢城試試卷令赴試諸生易書未便

請令內侍茶房架閣庫三軍錄事及齋郎權知直長吏典等易書從之
○壬寅講武于平康等處是日次于揚州楓川平京畿監司李明德來
進方物○癸卯次于松節院○甲辰次于馬山江原道都事李元根來
問安○乙巳次于甲非川江原道監司崔府來進方物○丙午夜雨雪
次于今音屈咸吉道都事安崇信來問安○三月丁未朔次于童山○
戊申次于積山○吏曹判書李孟昉來問安○命囚平康縣監崔仲基
及守場人全彥等十二人于義禁府以講武場內不禁私獵致禽獸鮮
少也○己酉次于鐵原多也蓋○庚戌次于窟洞○中部長通坊人家
失火延燒四十餘戶○辛亥 上聞火災爲之驚駭不觀獵○傳旨禮
曹還宮時各殿各宮及議政府六曹勿進豐呈○次于每場院○壬子
王世子來見于多也巖○賜京畿監司李明德經歷李繼長等衣○
文武群臣班迎于興仁門外○還宮即傳旨戶曹曰其審失火各戶依
丙午年例給賑濟米穀○傳旨刑曹設禁火都監專爲備火也今失火
若是必其備火之具未盡也其鞠官吏以聞○召義禁府提調曰平康
等處講武場禁放火私獵者有年宜其禽獸繁息而今甚稀少又多捕
獸之處其私獵之狀明矣姑勿加刑先問情由於監考全彥等○禮曹

啓文科館試令養賢庫錄事搜挾未便請依漢城試會試例以三軍五
員差遣從之○全羅道監司進新刊詩禮板子命下鑄字所○癸丑御
經筵講書立政至呂氏之說曰呂氏之論可謂通達義理然往往立論
無乃違本旨而過曲耶侍講官金墩對曰臣亦意其論說之支離也
上曰然 上曰講武甫十日而城中已失火其不慎禁火之備明矣刑
曹之鞫禁火都監負乎左代言許誠對曰時未畢鞫然因近日廣開街
路人多免死 上曰然○正朝使都摠制柳殷之副使漢城府尹沈道
源回自京師○甲寅御資善堂視事 上謂兵曹參判崔士康曰正朝
使柳殷之等回還告予曰西北面向化甲士一人賚毛物從童猛哥帖
木兒往上國路遇臣等曰我是朝鮮下番甲士兩國相通非小事也更
問甲士姓名以聞○命拷訊全彥等十一人皆不輸情 上謂左代言
鄭淵曰予意講武場私獵平康縣監必不知也此實閑曠之地如有深
入行獵者守令安能盡知耶監考全彥等必相知之此雖小事然通同
欺誑不直承服甚爲可憎不可不露其實也去冬嘗聞獐鹿肉多賣於
市京畿獐鹿所聚之處但有此地耳若問其肉出處則私獵之狀自露
矣○輪對經筵○乙卯御經筵輪對○遣義禁府都事鄭賜于淮陽鞫

講武場私獵人○丙辰視事經筵輪對○忠清道監司具啓蠶室養蠶之弊 上謂知申事鄭欽之曰公桑蠶室其來尚矣然我國養蠶之事擾民實多故往者稍除其弊其下戶曹更條列其弊以聞欽之對曰養蠶供役者皆革去寺社奴婢也往者令收半貢今更全免何如從之○禮曹判書申商啓使臣支待路傍州縣所難繼者獐鹿肉也請令多畜雞豚以備後日之用 上曰更議以啓○丁巳御經筵輪對○漢城府啓望告造家空地者累月不受文案及其他人望告則率以先呈爲辭請自今望告後過三朔者依未造家例移給他人從之○忠清道監司啓前此登第者並令還鄉榮親欲其誘掖獎勵作興人材也近無成法或行或廢以絲毫之弊而輕廢羨厚之風實爲未便命禮曹詳定以聞○戊午幸平丘驛東平觀獵○己未御經筵輪對○禮曹啓鑄鍾所呈今考編鐘體制宋仁宗時范鎮所制編鐘則自黃鍾至應鍾因其體之大小定其聲之清濁其厚薄則同本朝中國出來編鐘則自黃鍾至應鍾因其體之厚薄定其聲之清濁其大小則同今所鑄依范鎮之制以大小鑄之乎依舊鍾之制以厚薄鑄之乎且前朝中國出來編鐘有畫兒奢侈華美丙戌年賜樂編鐘則無畫兒純儉質素將依何鍾而

鑄祭享之樂從儉素朝會之樂從華美何如請將編鐘之制從厚薄鑄成並依丙戌年賜樂體制鑄之從之○禮曹判書申商啓近者汰冗官過多故事務煩而朝官小古者一曹尚有判書三人俸祿稱之請勿以俸祿之費而汰朝官 上曰癸卯年間汰冗官而各司判官太半汰去其時司僕判官亦在所革而今又還差矣○左代言許誠啓祭及高祖之議 上曰予以此禮為難斷也通祭四代之禮先儒所未定只祭三代之禮 先祖之成憲此亦依古法而制者也何可輕有紛更天子七諸侯五大夫三士二此古人降殺之制也而今上自大夫下至庶人皆得祭四代則尊卑之等不亦無別乎○叅贊盧閑啓今來使臣多率差批不錄頭目而來請自今有如此率來者勿許入義州 上曰差批不錄之人不許入來義固當矣然不必使終不入也但以此意諷諭使臣可也

○右副代言李孟珍啓講武之日別侍衛節制使郭承佑馳駕射獵不糾察驅獸軍請令推鞠以懲不恪 上曰但罷節制之任○庚申視事輪對經筵○親傳望祭香祝○瑞興人金汝島之女孝生年十二其父得狂疾孝生聞食生人骨即愈密令人刃斫手指不使父母知之居三日和羹以飼父疾少間本道監司上其事請旌門復戶從之○府院君

李稷判府事許稠叅判鄭招等以爲父歿子繼職秩不及撤其神主以待後日之得官者不過二道曰瘞埋也襲藏也旣埋復作於禮無文事理亦礙襲而藏之與天子諸侯遷廟之主藏于夾室似矣然而士大夫家廟則無夾室矣若建別廟則卿大夫合三代爲一祠堂士於曾祖尚不得祭安得建廟以奉之若藏於廟則一祭一否誠爲未便若藏於廳事則接對賓客之所若藏於寢房則夫婦所居之處或廊或庫卑下不敬皆非所宜且天子諸侯夾室所藏之主雖無四時之祭至三年則有祫祭矣今此襲藏之主致祭無期如或未得官則終當如何孝孫之心事死如生理之則已矣藏而不祭於心何如程子朱子皆以通祭四代爲禮朝廷亦許品官之家祭及高祖雖不明言其故豈不以此也哉臣等初議欲從朝廷之制與夫程朱之說則元典六品以上亦祭止三代故乞令品官通祭三代者盖用元典世代限數而取法通祭之義也議上令臣等更議又乞依朝廷之制乃下禮曹令文臣四品以上議其可否議者以世數加於元典爲更改成憲然臣等竊謂前日之議乃補元典之未備耳非改也乞取臣等前日所進兩議裁擇左議政黃喜判府事卞季良判書申商叅判金孝孫等以爲父沒子繼則父之曾祖於子爲

高祖其神主當埋於墓側若子職不相等者將其不應祭之神主重襲以藏以待加職出而祭之何如從喜等議○辛酉幸綠楊平觀放鷹○壬戌視事御經筵輪對○戶曹啓忠清道人民貧窮丐乞者頗多請賑之其年過七八十及廢疾者考其親戚有無並令惠養從之且曰勿問親戚有無悉令惠養○芳幹女婿前知郡事朴景茂副司直李大生等狀啓妻父婢妾子自終之子他乃曾於忠清道海美縣自願安置今自稱蒙赦再來京師臣等未知蒙宥與否敢告命仍置海美縣○禮曹啓使臣往來之時平安道守令則郊外迎候京畿黃海道則館門迎候爲禮不同請自今使臣出來則並郊外迎命回還則館門迎候從之○議政府啓涉溫雖違姜尚仁等獄辭而受罪然太宗特賜自盡且令李陽達擇地葬之蓋以恭妃作配宸極誕育元良也況其時溫不服招乎若其不死則當命還告身削除罪籍第以賓天太遽未及下教耳乞還給溫告身以慰臣等之望上曰此父王時事不可輕議也父王於溫之回自京師也欲不推鞠而流之於外其時執事者一人固請鞠問然後許之溫遂服兵柄宜歸一處之語問所謂一處何處答曰一處則主上也又問歸一處之後欲何爲耶答曰予亦武班也欲掌兵權耳

以此觀之溫非不服招也然非叛逆之臣也諸卿宜取義禁府文案考之○癸亥 上打毬諸宗親入侍○政府六曹會于議政府議沈溫事啓曰沈溫之事在姜尚仁等已誅之後無所對辯則是疑獄也其時連逮尚仁而對辯得免者亦有之以此觀之豈得無疑乎若 太宗將欲加罪於溫則豈盡誅尚仁等而不待溫之來使之對辯乎不待溫來而盡誅之則其欲宥溫斷可知矣此所以待溫之來欲不問而流之也上曰吾當商量時吏曹叅判鄭招言於座中曰吾以司諫叅鞠獄事溫當鞠問之際心欲辯白然不日間再加訊杖三加壓膝而猶不服都提調柳廷顯謂溫曰以公位勢觀今日鞠問之勢則可知矣終能不服乎溫聽此言更無一語一一服招今以鄭招之言觀之則溫之服招安知其出於不得已乎 太宗其盡知如此事乎○甲子御經筵輪對○以宋仁山爲僉摠制○頒賜楚辭于集賢殿官及東班軍器副正以上○命印頒元續六典于中外官○命除平安道採金○乙丑幸迎曙驛平觀放鷹還至盤松亭觀軍士擊毬騎射○丙寅視事左代言許誠啓中文科者請令榮親 上曰考諸周官六翼以聞誠又啓曰忠清道考試官於鄉試額數外增取一人 上曰令其道監司核問情由以聞○判

府事許稠啓三島倭人來居乃而浦等處興販資生者頗多請收其稅
上曰自己交年以後非唯商船不通倭客亦不相通近來始來興販不
必稅也知申事鄭欽之亦啓收稅商倭實未可也 上曰其問興販倭
人之數於萬戶處置使以聞○上曰平康縣監崔仲基監考全彥等
可恣放遣且教仲基曰自今講武場內只擒祭用獐三口若於數外加
獲則具由以達仍謂右代言鄭淵曰古者園囿之內芻蕘者往焉雉兔
者往焉則似不禁私獵也殺其麋鹿者如殺人之罪則又過於嚴禁也
然由今觀之講武之法所以訓民戎事用戒不虞所係非輕禁令不可
不嚴也自今場內私獵者及守令並以制書有違論罪○鄭欽之啓左
右議政六曹判書共議以爲成均館國學也督聚儒生尋自散去甚爲
虛踈勸學之術莫若無特別試別試之法行則儒生不令而自聚不勸
而自勵矣 上曰予於戊戌年一行別試試取之後必復怠惰矣若無
特別試而取人不多或隔年一試或一年再試則儒生自聚足以勤學
矣○輪對經筵○詳定所提調府院君李稷左議政黃喜判府事許稠
判書申商參判金孝孫鄭招等以爲謹按唐開元禮皇帝時享太廟儀
奠爵出戶北面立大祝進戶外之右階讀祝再拜皇帝謁陵儀至寢殿三

奠爵當神座前北向立大祝二人持玉冊于戶外跪讀再拜宋郊祀前
一日朝享大廟儀設冊案於室戶外之右皇帝奠爵出戶外北向立讀
祝官東向跪讀冊文再拜太廟時享儀祝版各設於神位之右初獻奠
爵出戶外北向立大祝跪讀祝文訖再拜郊祀前二日朝獻景靈宮儀
設祝冊於殿上之西皇帝進酒俛伏興立讀冊官東向跪讀冊四孟朝
獻景靈宮儀皇帝奠酒俛伏興再拜無讀祝一節每歲春秋仲月太常
宗正卿朝拜祖宗及后陵詣神座前奠酒俛伏興俟大祝讀文訖再拜
降階前朝詳定古今禮時享大廟儀設祝坫於每室戶外之右奠爵出
戶北向立大祝進戶外之右讀祝再拜朔望享大廟儀各設祝版加坫
上置於神座之右上方酒俛伏興小退北向立祝史持版進神座之右
東向跪讀祝文獻官再拜拜陵儀奠酒三爵小退北向立大祝持版詣
神座右跪讀再拜竊詳唐宋及前朝之制奠爵後行禮或出戶外或當
神位前祝文或設於神位之右或設於戶外之右或設於殿上之西未
可定從本朝 宗廟戶外窄狹展禮尤難乞奠爵後行禮皆當神座
之前讀祝皆於獻官之左祝版皆設於神位之右若 原廟戶內伏地
則古典所無然本朝常時出入殿內有伏地 原廟多用平日之禮仍

舊何如判府事卞季良議 宗廟用古禮 原廟用俗禮 古人有是言

也我 太宗嘗曰 宗廟以神道事之 原廟象生時則其 原廟戶內

伏地一從成憲何如其戶外讀祝事唐宋宗廟雖非古制然其體面甚

大其內修葺必多曲折所謂戶外讀祝亦必不在於外階也明矣今徒

泥戶外之文而輕改成憲臣固痛心今承下問予勝欣忭願遵 祖宗

成憲今後議新法時禮曹啓目汎稱曹與詳定所同議最爲不可宜列

詳定提調某某之名以聞永爲恒式從之○丁卯御經筵輪對○上曰

漢原君趙璿欲服侍養之喪何如知申事鄭欽之對曰收養之法遺棄

小兒即同己子故服喪如其親可也若侍養則有何恩德而服其喪乎

往往有貪得臧獲而冒禮行喪者是豈法乎○戊辰視事禮曹判書申

商啓僧徒度牒欲待畢營太平館然後悉給之 上曰太平館之役乃

別例也不必僧人盡赴此役然後可給牒也商對曰雖在外方之僧皆

願受度牒者無他雖號禪師者無度牒則並令還俗已有成法故也

上曰然○判府事許稠啓孝經小學皆初學所當先習之書也而小學

講於科舉之時故儒者皆不得已而讀之若孝經則世之初學專不讀

習請出經筵句解孝經刊行以教初學 上曰然命左代言許誠曰可

令鑄字所印出二百五十枚頒行誠啓曰臣聞乃而浦等處恒居倭等
興販之稅左衛門大郎悉收之美居既累年不宜刷還彼已收稅又難
復收 上曰恒居興販其來已久不必更立新法也○輪對御極筵○
議政府六曹同進封章 上不開封問曰此何事也知申事鄭欽之對
曰此乃前日事也 上曰此事予已熟聞何必見此書乎遂下承政院
事秘不可得詳其略則沈氏罪名未見而被誅故請赦之○吏曹啓前
此吏科無定額亦無年限曾於丙午年受教定額七十人然校書館則
仍舊無定額請自今校書館取二百十人報本曹曹考其世系依永樂
十七年三月受教更試七十人差初入仕出身之職署經臺諫給牒又
考才品隨成衆各處去官多少量數分遣從之○吏曹啓奉常寺推樂
署樂工一祭所用搃一百四十九人並祭則二百九十八人前此以巫
女子姪及良人丁吏等屬之元額僅二百人而欠九十八人其元屬者
亦皆外方殘劣單寒之人未能贏糧久留連亡頗多况因年老喪病雜
故太半不仕每當祀事一祭所任尚未能贍如遇並祭則專以軍器別
軍充之實爲未便凡音律之任累年學習乃得成才其遲鈍者雖加勸
勉略無寸進請於元額二百加一百五十依舊例以巫女子姪閑散良

民擇取年十三歲以上三十歲以下京中三十名忠清道三十名全羅道三十五名慶尚道四十名江原道十五名其祿官則於六品加副典樂一七品典律二八品副典律三九品直律三以示勸勵從之○命兵曹與政府諸曹同議成吉道鏡城慶源糧餉移轉之術參判崔士儀金孝孫等以爲鏡城米穀移之慶源吉州米穀移之鏡城參判鄭招以爲戶曹酌定轉輸之數每當農隙必令輸轉左議政黃喜右議政孟思誠贊成權軫判書崔閏德安純吳陞申商李孟昉金自知參贊盧閑等以爲國庫米穀移輸未便宜令吉州北面人納其田租還上于鏡城鏡城納于慶源始自己酉秋量宜收納從喜等議○己巳上打毬于資善堂諸宗親入侍○夜盜殺倭通事李春發于薰陶坊之街○禮曹啓文武科會試座次禮度依生負會試座次禮從一品及正二品北壁從二品參議西壁通政以下六品以上參考官南行若試官正一品則依文科已定例正一品北壁從一品及正二品東壁從二品西壁參議南行通政以下參考官南後行迎送揖拜禮依已定格例從之○庚午視事輪對經筵○命義禁府刑曹同捕殺李春發之盜義禁府啓有能捕告者請賞絲布一百匹仍給犯人財產從之○辛未輪對御經筵○成吉

道永興府軍器庫火○傳旨承政院古者宮禁之內常用紅漆蠟爲燭
謂之紅大燭 太宗時始代以柁炬崇儉之意至矣然柁炬火易盛故
頃刻不慎則燼焰亂落恐或延燒幃帳今不必如紅大燭但用蠟塗於
五升布每一日進大殿東殿各一枚名之曰布燭○壬申視事右代言
鄭淵啓今有人突入駕前者按律當絞 上曰是大不然如知其有法
而敢突入則律當如此無知之人迷不知去處而突入者亦以此律抵
罪則其可乎更照律以聞○輪對御經筵○集賢殿啓經筵所藏書冊
不可無標記請以經筵二字作圖書每卷著標又以內賜二字作圖書
如有賜者著標以賜從之○平安道都節制使具寧邊府設立條件
以啓一宣德三年十一月十九日兵曹受教內寧邊府亦依平壤府例量
加西班牙官之職使邊民樂於趨赴以成巨鎮今考平壤府西班牙各品
之數鎮西衛五領司直六副司直司正副司正各十隊長一百隊長二
百共三百三十六請依此例擇可任者差下一古延山撫山居民搃八
百九十二戶內甲士及京從仕翼步兵守城軍防牌合排四處立馬人
鄉吏日守兩班公私奴隸等不實之戶多而實戶則少於巨鎮不得已
之任大半不足若西北邊方防禦緊要各官之民流移到本府者悉令

還本本府以南各官及他道之民來接者限本府阜盛勿令還本一本
府東有獐項淵南有夫伊塔淵西有仇音浦淵若值霖雨大水則過漲
實難請於三處設置舟楫定無役人爲津尺命下兵曹與政府六曹同
議議云土官依鎮北衛例別立三鎮稱鎮邊衛每一領司直一副司直
二司正副司正各三隊長十隊副二十流移人則寧邊府以南各道及
他道流移人物限本府阜盛間勿令還本三淵置舟楫則每一處只設
船一隻並從之○兵曹啓各領防牌牌頭請於去官防牌中擇可者每
一衛一人差爲行隊長勿別聚會出番則仕于各衛令其領上大護軍護
軍考察入番則牌頭率入令其領護軍考察諸處赴役則牌頭身率
赴役牌內人或逃亡或累朔未見散亂無統則依宣德元年二月日受
教收其職牒外方人則定于船軍京中人則定于各司皂隸所由杖首
都府外等並治牌頭之罪其防牌肄習依已曾受教施行從之○癸酉
御經筵輪對○禮曹啓宗貞盛所遣表阿多羅賈銅鐵欲易螺鉢火鑪
磬子銅盆銅湯灌等物請令工曹計手功錢鑄給從之○禮曹啓日本
通信使朴瑞生馳報對馬島宗彥七供柴木謹守護遣人安慰然貧甚
朝不慮夕乃至居民俱有菜色以此觀之宗貞盛貞澄亦應如此然皆

服王化忍不爲賊寧不重爲吾國喜耶今彗七遣人願濟飢因非有他
望請依前例賜貞盛米豆并二百石彗七米豆并八十石從之○甲戌
視事輪對經筵○宗貞盛致書禮曹謝賜般若經仍獻土物回賜正布
一百九十四匹○謹寧君程誼城君容放鷹于箭串命義禁府鞭其丘
史各四十仍傳旨兵曹自後如不能禁私獵則嚴加罪責其知之○乙
亥輪對御經筵○親傳朔祭香祝

世宗莊憲大王實錄卷第四十三

(B)
732.55
4724
[v.4]
no.13
0163671

...大王寶... 卷四十三

文辭推... ○... 卷四十三

... ○... 卷四十三

... ○... 卷四十三

... ○... 卷四十三

... ○... 卷四十三

昭和五年九月十五日印刷
昭和五年九月二十日發行

(景李朝實錄太白山本)

京城帝國大學法文學部

京城府蓬萊町三丁目六十二番地

印刷所 朝鮮印刷株式會社

(B)
732.55
4724
[v.4]
no.13